

## Xi Jesucristo yakutsejen nga kuan APOCALIPSIS

<sup>1</sup> Jesucristo yakutsejen xi kua'indut'a xujunbi. Na'enchana kitsingantsjare, tuxi kuakutsejennire xuta xi tse'e me xi tjinnere nga je kuan xati. 'Ba kui kitsikasen ankjere tuxi kuakutsejennire Juan kibi, ngat'a= jngu= xuta xi tse'e. <sup>2</sup> 'Ba Juan kitsuyakixi= ngat'are ngayéje xi tsabe. Kui= xi kitsikixiya ngat'are enre Na'enchana ko mé= xi kitsuyakixi Jesucristo.

<sup>3</sup> ¡Ndaxure xi 'bexkiyare xujunbi xuta 'ba xi basen ñojon xi kitsuya Na'enchana! 'Ba ¡ndaxure xi 'bejñatjo xi kua'indut'a nga'e, ngat'a je tijña tiña nixtjiun nga 'ba kuan!

*Kjuate'nda xi Juan kitsikasenre xuta xi mak-jainre ngat'are Jesús*

<sup>4</sup> An, Juan, tetsikasen\_ra xujunbi xuta xi mak-jainre ngat'are Na'enna xi yatu ka'a mani xi tjin nangi Asia. Ngatjas'enu kjuanda ko kjuaxiu xi tsja\_nuu Na'enchana. Kui xi tijña xi tsik'ejña 'ba xi kju'a'e. 'Ba nde ngatjas'enu kjuanda ko kjuaxiu xi tsja\_nuu isennixtjin xi yatu mani xi tjin ngixkun yaxile ña tibatexuma Na'enchana. <sup>5</sup> 'Ba nde ngatjas'enu kjuanda ko kjuaxiu xi tsja\_nuu Jesucristo ngayeje.

Jesucristo, kui xi kixi tsikixiya ngat'are xi kjuakixire Na'enchana, 'ba kui xi tjun ja'ayare ngajinre mik'en 'ba xi batexuma tsi'ire rey xi tjin jo kji'i ngasun'ndio. Kui= xi tsimejénna 'ba kitsindaina

ngat'are jena nga 'esten jinre. <sup>6</sup> Je kitsa'enna xuta xi tse'e, tuxi kuatexumanina. 'Ba kitsa'enna joni na'mi, tuxi si'axat'ani\_ra Na'enchana xi Na'enre. ¡Ngatjas'ere kjuaje ko kjua'ñu ka'nda ngantsjai nix-tjin! 'Ba ngatjama.

<sup>7</sup> Chutsijon, ¡Cristo ndiba= ngajin yufi!

Ngatsi'i xuta skue=,  
ka'nda nchja xi juñare lanza.

'Ba ngatsil'i nixinanda xi tjin ngasun'ndio  
ski'nda= nga on kuanre ngat'are kui.

Kjuakixi= nga 'ba kuan, 'ba ngatjama.

<sup>8</sup> "An= ña xi alfa ko omega, xi titjun 'ba xi fet'ani",  
tsu Na'enchana xi tjinre ngayéje kjua'ñu. Kui xi  
tijña xi tsik'ejña 'ba xi kjua'e.

### *Jotsa'en yakutsejen yojoore Cristo*

<sup>9</sup> An, Juan, xi nts'io mañaq tu ngat'are kjuamakjainna, xi temato'on ndekuini xi temata'aan. Tu jngu kjuanima tebitjaxtia, tu jngu xi batexumana, 'ba tu jngu kjuatsejnda tjis'ena, ngat'a tu jngu makua Jesús. Ngat'a kitsikja'axtiuyaq enre Na'enchana ko en xi kitsuya Jesucristo, kui= kjua kjinik'ejñaninä isla xi Patmos 'mi. <sup>10</sup> 'Ba jngu tamingu ja'e ngajinna Isennixtjintsjere Na'enchana, 'ba ngastaan kjint'iaq jngu jnda xi 'ñu, joni jngu tjo xi 'ñu fane.

<sup>11</sup> 'Ba kitsuna:

—Ti'indut'ai xujun mé= xi xie 'ba tikasen\_ri xuta xi makjainre ngat'are Jesucristo xi yatu stin mani, xi tjin nangi Asia. Xi Éfeso, Esmirna, Pérgamo, Tiatira, Sardis, Filadelfia, 'ba ko Laodicea.

<sup>12</sup> 'Ba meni kitsiku'biä ngastaan, tuxi skueñä 'yä= xi tifakona. 'Ba nga kitsiku'biä, tsa'biä yatu

tsajmi xi s'endusun ndi'i lámpara xi oro kuan-dakoni. <sup>13</sup> 'Ba ngajinre tsajmi xi s'endusun ndi'i lámpara tsa'bia jngu xi tijña kio xi 'ba kji'i joni jngu xuta. Xi yaja jngu najñu nduju xi fechu ka'nda tesun ndsaku, 'ba tikjare nisinre jngu tjiuxin xi oro ni. <sup>14</sup> 'Ba ntsja ku 'batsa'en tiba joni ntsjare chutsanga asa joni nch'an. 'Ba tuxkun, 'batsa'en tí joni ndi'i. <sup>15</sup> 'Ba ndsaku, 'batsa'en tiba'nä joni kicha xi bronce ni xi kjini'na joni bronce xi sa'e kji'naxjejin ndi'i nga kuatsje. 'Ba ne 'ñu jndare, jotsa'en fane kioña ntjai nanda. <sup>16</sup> 'Ba ntsja kixi tjiyare yatu niñu, 'ba ts'a 'etjuni jngu kicha xi 'ñu yojoxkun kji'i xi yojó ngojó ngatere. 'Ba nkjain 'batsa'en ba'na joni nga 'ñu ma ndaba.

<sup>17</sup> 'Ba kionga tsa'bia, kiskaa ngi ndsaku joni tsa je tseyaa. Tunga yanenä ntsja kixi nga kitsunä:

—Bi kuin. An= ñä xi titjun 'ba xi fet'ani <sup>18</sup> 'ba xi tijñakun. Tseyaa=ñä, tunga nganda'e tejñakunñaa ka'nda ngantsjai nixtjin. 'Ba an ya'aä llavere kjuabeya ko nga'ndere mik'en. <sup>19</sup> 'Bamani tsu'ba, ti'indi mé= xi kji'ye ko mé= xi tjima nganda'e 'ba ko mé= xi kuan jaskanre kibi. <sup>20</sup> 'Ba 'bi= tsunire mé= xi tji'mo ngat'are niñu xi yatu kji'ye nga tjiya nd-saä kixi ko yatu tsajmi xi s'endusun ndi'i lámpara xi suba oro ni. Niñu xi yatu, tsu=nire ankjelere xuta xi makjainre ngat'are Jesucristo xi yatu stin mani. 'Ba tsajmi xi yatu mani ñä s'endusun ndi'i lámpara, tsu=nire xuta xi makjainre ngat'are Jesucristo xi yatu stin mani.

## 2

*En xi Jesucristo kitsikasenre xuta xi makjainre*

*ngat'are kui xi tjindu naxinanda Éfeso*

<sup>1</sup> 'Ti'indu\_ri ankje xi tse'e xuta xi makjainre ngat'anq xi tjindu naxinanda Éfeso: "Bi tsu xi ya'a yatu niñu ntsja kixi, xi tsu'bajin yatu tsajmi xi oro ni ña s'endusun ndi'i lámpara: <sup>2</sup> 'Be=ñq xi teñe'en, 'ba jótsa'en teningantsja\_ri yojori xa xi teñe'en, 'ba jótsa'en tikakori. 'Ba 'be=ñq nga bi tikakori xuta xi tsa'en kjuach'o. Je= kichut'ayakue xuta xi apóstol tsure yojore tunga bi kui ni, 'ba je= kji'ye nga ndesu=nini. <sup>3</sup> 'Ba 'be=ñq nga ko kjuatsejnda tichukjuakori kjuanima xi tisakuri ngat'anq, 'ba bi tifere takuin. <sup>4</sup> Tunga kui=bi xi bi tisasenna ngat'ari: nga bi nde tjinniri kjuanimejen xi kis'eri ngatuts'inre kionga tjun kuakjainri ngat'ana. <sup>5</sup> Kui kjua tikja'etsjenni jó kji'i kjin je k'int'axin 'ba tik'antjaiyani kjuafa'etsjenri 'ba ndiba ngani ngixkun Na'enchana, 'ba ti'an ngani xi kjiñe'en ngatuts'inre. Tsa bi sik'antjaiyani kjuafa'etsjenri 'ba kjua'e ngani ngixkun Na'enchana, kjua'ekunraq 'ba kjua'axin=ñq tsajmiri ña s'endusun ndi'i lámpara ña tijñña. <sup>6</sup> Tunga ngat'are kibi= xi nda nchja ngat'ari: nga mastiche mé= xi tsa'en xuta xi tjenngire xuta xi Nicolaus 'mi. 'Ba=nde ko an mastike=ñq mé= xi tsa'en. <sup>7</sup> ¡Xi tjin ñojon ngatasen ñojon mé= xi titsure Isennixtjintsjere Na'enchana xuta xi makjainre ngat'anq! Xi sa'en, kui= xi sja'nde\_ra nga skine ture ya xi tsik'endukunre xuta, xi sejñña ñia paraiso 'mi, nga'nde xi tse'e Na'enchana."

*En xi Jesucristo kitsikasenre xuta xi makjainre  
ngat'are kui xi tjindu naxinanda Esmirna*

<sup>8</sup> "Ba ti'indu\_ri ankje xi tse'e xuta xi makjainre ngat'anq̄ xi tjindu naxinanda Esmirna: "Bi tsu xi Titjun 'ba xi Fet'ani, xi k'en 'ba xi tijñakun ngani: <sup>9</sup> 'Be=ñq̄ kjuanima xi techja'ai 'ba kjuanimari, ninga kjuakixi= nga nyinai. 'Ba 'be=ñq̄ jo ch'otsa'en nchja ngat'ari xuta judío xi kitujin ngat'are Na'enchana tsure yojore tunga bi kui ni. Tusa xuta xi tse'e ni'ya sinagogare chanayiu=nini. <sup>10</sup> Bi kun\_ri ngat'are kjuanima xi kuitjaxti. Ngu chanayiu skanis'en nduya yak'a xuta xi tu jngujún, tuxi xut'ayakoninú, 'ba kuitjaxti kjuana'en te nixtjin. Kixi tisen, ninga tsa tjinnere nga kjuunik'enri, 'ba an sjara kjuabenichun xi bi fet'a joni chji xi kua'ere xuta xi sa'en. <sup>11</sup> Xi tjin ñojon ngatasen ñojon mé= xi titsure Isennix-tjintsjere Na'enchana xuta xi makjainre ngat'anq̄! Xi sa'en, kui xi niñajanni siko kjuabeya xi majóni."

*En xi Jesucristo kitsikasenre xuta xi makjainre ngat'are kui xi tjindu naxinanda Pérgamo*

<sup>12</sup> "Ba ti'indu\_ri ankje xi tse'e xuta xi makjainre ngat'anq̄ xi tjindu naxinanda Pérgamo: "Bi tsu xi ya'a kicha xi 'ñu yojoxkun kji'i xi yojó ngojó ngatere: <sup>13</sup> 'Be=ñq̄ nga teni nga'nde ña tijña chanayiu nga tibatexuma. Tunga ji janda= kixi tesen ngat'anq̄ 'ba bi kjinicheje kjuamakjainri ngat'anq̄, nisi nixtjin nga kjinik'en xi Antipas 'mi. Xi xuta kixi xi kitsikixiya ngat'anq̄ 'ba xi kjinik'en nanginu, ña tijña chanayiu. <sup>14</sup> Tunga tjin= masen tsajmi xi bi tisasenna ngat'ari. Ngat'a teba'e'ndeni nga tjindujin yak'ari xi inya'bejñatjo xi yakuya Balaam. Xi inya'a Balac jotsa'en sa'en nga kuan k'uejña kjuana'en ngat'are

kjuamakjainre naxinanda Israel nga skine chje xi kitsa'ere na'en xi ntsja xuta kuandani 'ba nga sa'en kjuachajngi ngayeje. <sup>15</sup> 'Ba nde teba'e'nde nga tjindujin yak'ari xi inya'bejñatjo xi bakuya xi tjenngire xuta xi Nicolaus 'mi. <sup>16</sup> 'Bamani, tik'antjaiye kjuafa'etsjenri 'ba ndiba ngani ngixkun Na'enchana. Tsa bi 'ba si'en, kju'a'ekunxatirą 'ba ko kicha xi ti'betjuni ndsu'baą skjankoňa xuta xi 'ba inyatsa'en. <sup>17</sup> jXi tjin ñojon ngatasen ñojon xi titsure Isennixtjintsjere Na'enchana xuta xi makjainre ngat'ana! Xi sa'en, kui= xi sja'nde\_rą nga skine mana xi kis'ejña'mo, 'ba nde sja\_rą jngu ndiojo tiba ña kua'indut'a jngu ja'en xatse xi tu'yá be. Tu kui sani xi xuntsja, kui= xi skue."

*En xi Jesucristo kitsikasenre xuta xi makjainre ngat'are kui xi tjindu naxinanda Tiatira*

<sup>18</sup> "Ba nde ti'indu\_ri ankje xi tse'e xuta xi makjainre ngat'ana xi tjindu naxinanda Tiatira: "Bi tsu Ki'ndire Na'enchana, xi 'ba kun tuxkun joni ndi'i 'ba ndsaku joni bronce xi kua'na nga kjinitjsje: <sup>19</sup> 'Be=ñą mé= xi tu ñe'en. 'Be=ñą ngat'are kjuanimejenri 'ba ngat'are kjuamakjainri ngat'ana. 'Be=ñą jótsa'en teña'axat'anaq 'ba jótsa'en ko kjuatsejnda tichukjuakori. 'Ba=nde 'bią nga ngisa 'ñu teña'axai nganda'e nga ko mare ngatuts'inre kionga tjun kuakjainri ngat'ana. <sup>20</sup> Tunga kibi= xi bi tisasenna ngat'ari, nga teba'e'nde\_ri chjun xi Jezabel 'mi xi jngu profeta tsure yojore nga ti'bonachare xutaną ko xi tibakuya nga sa'en kjuachajngi 'ba nga skine chje xi kitsa'ere na'en xi ntsja

xuta kuandani. <sup>21</sup> Je= kitsja'nde\_ra chjunbiu nga sik'antjaiya kjuafa'etsjenre 'ba kjua'e ngani ngixkun Na'enchana, tunga bi mejénre k'uejña kjuachajngire. <sup>22</sup> Kui kjua sikajña'onñä chjunbiu, 'ba 'ñu tse kjuana'en xi sja\_ra nchja xi tsa'enko kjuachajngi ngayeje, tsa bi sik'antjaiya kjuafa'etsjenre nga k'uendu xi kuánre ngat'are chjunbiu. <sup>23</sup> 'Ba sik'en=ñä xi tjenngire chjunbiu, 'ba 'batsa'en skueni ngatsi'i xuta xi makjainre ngat'anä nga an xi 'biä jó fa tjin kjuafa'etsjenre ko inimare xuta. 'Ba nga jngu jnguu sjanu chjinu jo nga kjiño'on. <sup>24</sup> 'Ba ngat'anu jun xi tetsubo Tiatira xi bi te'bejñatjo en xi tibakuya chjunbiu 'ba xi bi tjimanu ngat'are xi kjuatji'more chanayiu 'mi, xin\_nuu nga bi nde sja ngisani\_nuu kja'e ch'a. <sup>25</sup> Tunga t'ejñatjo=ñu mé= xi je tjinnu 'nda ngä an kjua'e ngañaa. <sup>26</sup> Xi sa'en 'ba xi janda kuendujuko xa xi mejénnä nga sa'en, kui= xi sja\_ra kjua'ñu nga kuatexumare naxinanda xi tjin ngasun'ndio. <sup>27</sup> Kuatexuma ko jngu yaníse xi kicha kuandakoni. 'Ba 'ñu kuejenre xuta, 'ba 'ba= kuanre xuta joni jngu tiji nangi xi maxkua nga bichune kicha. Sja\_ra kjua'ñu jotsa'en kitsjana kjua'ñu Na'enna. <sup>28</sup> 'Ba nde sja\_ra niñu xi ngisa tí nga je tjis'e isen. <sup>29</sup> ¡Xi tjin ñojon ngatasen ñojon mé= xi titsure Isennixtjintsjere Na'enchana xuta xi makjainre ngat'anä!"

### 3

*En xi Jesucristo kitsikasenre xuta xi makjainre ngat'are kui xi tjindu naxinanda Sardis*

**1** "Ba ti'indu\_ri ankje xi tse'e xuta xi makjainre ngat'anq xi tjindu naxinanda Sardis: "Bi tsu xi tjinre isennixtjin xi yatu xi tse'e Na'enchana ko niñu xi yatu mani: 'Be=ñq xi teñe'en. 'Bi inyatsu xuta nga tenichunni, tunga ngat'anq je=tseye. **2** Tikja'a\_ri 'ba ta'e nga'ñuri yojori nga kje beyajín, ngu te'beñq nga bi kixi te'mikue xari ngixkun Na'enchana. **3** 'Bamani tsuba, tikja'etsjenya\_ri yojori 'ba t'ejñatjai xi kika'eri ko xi kjinu'ye, 'ba tik'antjaiye kjuafa'etsjenri 'ba ndetjenngi ngani Na'enchana. Tsa bi sikja'a\_ri yojori, kju'a'ekunraq joni jngu chacheje 'ba bi xie mé= chuba kjua'ekunraq. **4** Tunga ngajin naxinanda Sardis tjindujin yak'ari xuta xi bi inyatsijndi najñure. Kui xi k'uetsumakonq nga kuaja najñu tiba, ngat'a bakin=re. **5** Xi sa'en, kui xi kjuunikaja najñu tiba 'ba bi sichajaan ja'enre xujun ña kua'indut'a ja'enre xuta xi k'uendukun. Tusa xiñq nga xutanq kuán ngixkun Na'enna 'ba ngixkun ankjelere. **6** ¡Xi tjin ñojon ngatasen ñojon mé= xi titsure Isennixtjintsjere Na'enchana xuta xi makjainre ngat'anq!"

*En xi Jesucristo kitsikasenre xuta xi makjainre ngat'are kui xi tjindu naxinanda Filadelfia*

**7** "Ba ti'indu\_ri ankje xi tse'e xuta xi makjainre ngat'anq xi tjindu naxinanda Filadelfia: "Bi titsu xi tsje 'ba xi kjuakixi, xi ya'a llavere rey David, xi kje'i xuntja, 'ba tu'yá mare 'bechjaaq; 'ba xi 'bechja xuntja, 'ba ni'yá mare chju'i: **8** 'Be=ñq xi teñe'en 'ba 'be=ñq nga tsajainri nga'ñuu. Tunga tenik'etjusun=ni enna 'ba bi tesji nga bi xutanq kuái. Chutsejen. Ngixkuin

kiskjex'aa jngu xuntja xi tu'yá mare 'bechjaä.  
<sup>9</sup> Chutsejen jó sikuä xuta xi tse'e ni'ya sinagogare chanayiu, xuta judío xi Na'enchanana kiskja'ajin tsure yojore tunga tu en ndesu=nini. An=ñä xi 'ba sa'aän nga kjua'ekinyakunch'int'a ngi nd-sakui, tuxi 'batsa'en skueni nga an tsimejénrä.  
<sup>10</sup> Kjinik'etjusun=ni ennaä nga kiskakori ko kjuatsejnda. Kui kjua k'uejñat'axinnirä ngat'are kjuanima xi kjua'e nixtjin nga xut'ayako ngatsi'i xuta xi tjin ngasun'ndio, kjuanima xi kjua'ene jo kji'i ngasun'ndio. <sup>11</sup> Kjua'exati=ñä. Nda t'ejñatjai xi tjinri, tuxi tu'yá skja'aniri chji xi kua'eri xi tsunire nga kjiñe'en. <sup>12</sup> Xi sa'en, kui xi sa'aän joni xjo xi sasengire ningure Na'ennaä, 'ba bi nde stjux-inni nga'ndebiu. 'Ba k'uet'a\_ra ja'enre Na'ennaä ko ja'enre naxinandare Na'ennaä, xi Jerusalén xatse 'mi xi Na'ennaä sikasenjenni ngank'aa. 'Ba 'ba nde k'uet'a\_ra ja'en xatsenaä ngayeje. <sup>13</sup> ¡Xi tjin ñojon ngatasen ñojon xi titsure Isennixtjintsjere Na'enchanana xuta xi makjainre ngat'ana!"

*En xi Jesucristo kitsikasenre xuta xi makjainre ngat'are kui xi tjindu naxinanda Laodicea*

<sup>14</sup> "Ba ti'indu\_ri ankje xi tse'e xuta xi makjainre ngat'anaä xi tjindu naxinanda Laodicea: "'Bi titsu xi kjuakixikjin, xi kixi tsikixiya ngat'are kjuakixire Na'enchanana, 'ba ngat'are kui Na'enchanana kitsa'en yeje xi tjin: <sup>15</sup> 'Be=ñä xi teñe'en. Ji jo=ni nanda xi bi nch'an 'ba ninga bi sje. ¡Tsa tu nch'anri asa sjeritsakaiñu! <sup>16</sup> Tunga tu isunt'ai=ni. Bi nch'en ninga bi sje. Kui kjua sikjesunnirä. <sup>17</sup> Ngu ji sjini: Nyina=ñä, tjin yeje=nä xi mejénnä 'ba tumé chajanä. Tunga bi 'yani nga tsajainri

kjuatsja, nga tumé chji=ri, nga nimai, nga kai 'ba nga tetsjusti. <sup>18</sup> 'Bamani an tsjaraŋ jngu en nga tindai xi tjinnä. Tindai oro xi niki nda=kjin ngat'a sa'e fa kuatsje nga kjinaxjejin ndi'i, tuxi kuanyinani ngixkun Na'enchana. 'Ba nde tindai najñu tiba xi kuan xeje ngayeje, tuxi kue'moni yojo kjistiri xi titsjari kjuasuba. 'Ba 'ba nde tindai ndaki xi kuinyangi tuxkuin ngayeje, tuxi nda kuatsejenniri. <sup>19</sup> An xi fatikua 'ba tsja ndiya\_ra ngatsi'i xi tsimijaŋ. 'Bamani tsu'ba, ta'e nga'ñuri yojori 'ba tik'antjaiye kjuafa'etsjenri 'ba ndiba ngani ngixkun Na'enchana. <sup>20</sup> Chutsejen, an tesenxtiu=ñä xuntjo nga tetsikjania. Tsa tjin xi kjuint'e jndanä 'ba skje'i xuntjo, kjua'as'enjin\_ra 'ba skineko=ñä niñu, 'ba kui skineko=nä ngayeje. <sup>21</sup> Xi sa'en, kui xi sja'nde\_ra nga k'uejñat'anä yaxile ña kuatexumaa, jotsa'en je kitsa'aan an ngayeje 'ba tejñat'a\_ra yaxilere Na'enna. <sup>22</sup> ¡Xi tjin ñojon ngatasen ñojon mé= xi titsure Isennixtjintsjere Na'enchana xuta xi makjainre ngat'ana!"

## 4

### *Jotsa'en nichjire Na'enchana ngank'aa*

<sup>1</sup> Jaskan nga je tsa'biä kibiu, kiskutsejiaŋ 'ba tsa'biä jngu xuntja xi kichjux'a ngank'aa. 'Ba jnda xi tjun kjint'e\_ra, xi 'batsa'en nu'yare joni nga fane tjio 'bi kitsuna: "Tijñe nga'e 'ba kuakutsejenra mé= xi tjinnere kuan jaskanñu."

<sup>2</sup> 'Ba ndekuini chubabiu ja'e ngajinna Isennixtjintsjere Na'enchana, 'ba tsa'biä nga sejña ngank'aa jngu yaxile je joni xi 'bendusun rey, 'ba tjin= xi tijñasun yaxilebiu. <sup>3</sup> 'Ba isenre xi tijñasun

yaxilebiu 'ba=tsa'en matsejen joni ndiojo xi tsjakun xi jaspe ko cornalina 'mi. 'Ba ngandaire yaxilebiu s'ejñandai jngu cha'ya xi matsejen joni ndiojo xi esmeralda 'mi. <sup>4</sup> 'Ba ngandaire yaxilebiu tsa'be ngisaq kañujun yaxile ña tjindusun kañujun nchja chinga xi yaja najñu tiba, 'ba ngasun nindaku titsusunre corona xi oro ni.

<sup>5</sup> 'Ba ña sejña yaxile jebiu 'betju ndi'i cho'on, si'a 'ba ko si'are cho'on. 'Ba ngankjain yaxilebiu inyati yatu ndi'i xi ya s'eku, xi isennixtjinre Na'enchana xi yatu mani. <sup>6</sup> 'Ba 'ba nde ngankjain yaxilebiu kijjña jngu tsajmi xi 'batsa'en matsejen joni jngu ndachikun xi chutsin nini xi 'ñu matsejenya.

'Ba ngandaire yaxile jebiu tjindu ñujun xi tjindukun jngu nga jngu jngu ngatere xi kitsejunre tuxkun ngankjain ko ngastun. <sup>7</sup> Xi titjun, 'batsa'en matsejen joni tjiuxa. Xi majóni, 'batsa'en matsejen joni tjiundi dia chi. 'Ba xi majánni, 'batsa'en chutsejen'a joni nkjain xuta. 'Ba xi mañujunni, 'batsa'en matsejen joni tjiuja xi titutjen.

<sup>8</sup> 'Ba nga ñujun xi tjindukun, nga jngu jngu jon jnga ya'a. 'Ba kitsejunre xkun ngi'ndere 'ba ngasunnk'are. 'Ba nga nixtjin nga nistjen bi tsikjejnda nga tsu:

Na'enchana= xi tsje, Na'enchana= xi tsje,  
Na'enchana= xi tsje.

Kui= tse'e ngayéje kjua'ñu xi tjin.

Kui xi tsik'ejña, xi tijña 'ba xi kjua'e.

<sup>9</sup> Nga ñujun xi tjindukun, kui xi be'e nijmi nga tjinre kjuaje xi tijñasun yaxilebiu, xi tijñakun ka'nda ngantsjai nixtjin. 'Ba bekun 'ba tsjare kjuanda. 'Ba nga 'ba tsa'en xi ñujun, <sup>10</sup> nchja chinga xi kañujun mani minyakunch'int'are nga

tsichjire xi tijñasun yaxile, xi tijñakun ka'nda ngantsjai nixtjin. 'Ba 'bendu corona xi titsusunre ngixkun yaxilebiu nga 'bi tsu:

**11** Ji Na'en xi Na'enni, ji xi bakinri  
nga chakunri, nga sakuri kjuaje 'ba nga  
kjuinichjire ngat'are kjuañuri.  
Ngat'a ji kjiñe'en ngayéje xi tjin,  
'ba ngat'a ji 'batsa'en kuamejénri kui= kjua tjinni  
'ba kuandani.

## 5

### *Ki'ndi borrego ko xujun xi kjiya ntsja xi tijñasun yaxile*

**1** 'Ba tsa'biä jngu xujun ngaya ntsja kixi xi tijñasun yaxilebiu. 'Ba kui xujunbiu kua'ndu ngastun ko ngankjain, 'ba yatu ka'a tjiñuni nga inyanere sello. **2** 'Ba tsa'biä jngu ankje xi 'ñu tjinre kjuañu, xi 'ñu tinchja nga titsu: “¿'Yá= xi bakinre nga sijoya sellore 'ba skanite xujunbiu?”

**3** Tunga ni'yá xi tjin ngank'aa ninga xi tjin ngasun'ndio 'ba ninga xi tjin ngi t'anangiu kuánre kiskanite xujunbiu, nga tuxi k'uxekiyani. **4** 'Ba an 'ñu kiski'ndaa, nga tu'yá kuasjai xi bakinre nga kiskanite xujunbiu ninga tu skutsejensare.

**5** 'Ba meni kitsuna jngu xuta chinga xi kañujun: “Bi nde chi'ndani. Chutsejen. Xi 'etjujinnire xuta xi ja'enire ntjere Judá, xi 'ba nguyare joni tjiuxa, 'ba xi jamare David, kui xi je kitsa'en 'ba bakin=re nga skanite xujunbiu 'ba sijoya sello xi yatu.”

**6** 'Ba tiñare yaxilio ko nga ñujun xi tjindukun 'ba ngamasenre nchja chinga xi kañujun tsa'biä jngu Ki'ndi borrego xi sejña nga'ndebiu, xi 'batsa'en matsejen joni tsa je kjinik'en. Tjinre yatu turu

ko yatu tuxkun xi isennixtjinre Na'enchana xi yatu mani xi nikasen jo kji'i ngasun'ndio. <sup>7</sup> 'Ba Ki'ndi borrego kitsitiñat'are xi tijñasun yaxile 'ba kiskjebe xujun xi kjiya ntsja kixi.

<sup>8</sup> 'Ba nga kiskjebe xujunbiu Ki'ndi borregobiu, nga ñujun xi tjindukun ko nchja chinga xi kañujun mani tsikinyakunch'int'are. Nga jngu jngu ya'a najni arpa 'ba ko nisu xi oro ni xi kitse tsajmi xi nda jen kanijnda, xi tsunire xi nchja xuta xi tse'e Na'enchana nga fako. <sup>9</sup> 'Ba kise son xatsebi: Ji xi bakinri nga xjube xujun 'ba sijoye sellore, ngat'a ji xi kjinik'enri 'ba xi kik'esten jinri, 'ba 'ba=tsa'en kik'echjintjaini tuxi kuatse'eni Na'enchana yak'a ngajinre ngatsi'i ntjere xuta xi tjin ngasun'nde, ko xi nchja kja'e kjuanga en, ko nixinanda xi tjin, 'ba ko xutare nangi xi tjin.

<sup>10</sup> Kui xi kjiñe'en jngu nixinanda xi batexuma, 'ba kui xi kjiñe'en na'mi xi sa'exat'are Na'enchana.

'Ba kuatexumare ngasun'ndio.

<sup>11</sup> 'Ba sa'e kiskutsejen ngañaq 'ba kjint'e jnda\_ra 'ñu nkjin ankje xi tsikinyat'a ngandaire yaxilio ko nga ñujun xi tjindukun 'ba ko nchja chinga xi kañujun. Tunga 'ñu nkjinnkjin= mani. <sup>12</sup> 'Ba ko jngu jnda xi 'ñu inyatsu:

Ki'ndi borrego xi kjinik'en, Kui= xi bakinre nga kjuinicjire ngat'are kjua'ñure, kjuanyinare, kjuankjin kakunre, 'ba ko nga'ñure. Ngatja'yakun kui, ngatjanichjire, 'ba ngatasakure kjuaje.

**13** 'Ba nde kjint'e jndá\_ra ngayéje xi kitsa'en Na'enchana ngank'aa, ngasun'ndio, ngi'ndere t'anangiu 'ba ko ngajin ndachikun, nga 'bi inyatsu:

Ki'ndi borrego ko xi tijñasun yaxilio,  
kui xi ngatjanichjire 'ba ngatja'yakun,  
'ba kui xi ngatasakure kjuaje ko kjua'ñu ka'nda  
ngantsjai nixtjin.

**14** 'Ba nga ñujun xi tjindukun kitsu: "i'Ba ngatjama!" 'Ba nchja chinga xi kañujun tsinyakunch'in  
'ba kitsichjire Ki'ndi borrego ko xi tijñasun yaxilio.

## 6

### *Sello xi yatu mani*

**1** 'Ba tsa'biä nga kitsijoya Ki'ndi borrego sello xi titjun, 'ba kjint'iaä nga kinchja jngu xi ñujun tjindukun. 'Ba jndare, 'batsa'en nu'yare joni nga fane cho'on. 'Ba kitsu: "Jabi!" **2** 'Ba 'batsa'en kiskutsijiän 'ba tsa'biä jngu chakabayu tiba. 'Ba xi tijñakjare tjiubabiu ya'a jngu arco. Kika'ere jngu corona 'ba 'etju nga titsa'en 'ba tuxi sa'en ngisani.

**3** 'Ba kionga kitsijoya ngani Ki'ndi borrego sello xi majóni, kjint'iaä nga kinchja xi majóni xi tjindukun 'ba kitsu: "Jabi!" **4** 'Ba 'batsa'en 'etju ngani kja'e chakabayu, jngu xi ini kji'i. 'Ba xi tijñakjare tjiubabiu, kika'ere jngu espada je. 'Ba nde kika'ere kjua'ñu nga kjua'axin kjuaxiu xi tjin ngasun'ndio, tuxi sik'enkañani xinkjin xuta.

**5** 'Ba kionga kitsijoya ngani Ki'ndi borrego sello xi majánni, kjint'e ngañaä nga kinchja ngani xi majánni xi tjindukun 'ba kitsu: "Jabi!" 'Ba 'batsa'en kiskutsijiän 'ba tsa'biä jngu chakabayu jma. 'Ba xi tijñakjare tjiubabiu ya'a jngu nisu

chuba. **6** 'Ba ngajinre nga ñujun xi tjindukun kjint'ia<sub>q</sub> jngu jnda xi kitsu: "Jngu kilo trigo asa jáñ kilo tu cebada 'batjin chjire jotjin jenre xuta nga jngu nixtjin tsa'exa. Tunga bi nikjetsin tsujmi ntje uva ninga olivo."

**7** 'Ba kionga kitsijoya Ki'ndi borrego sello xi mañujunni, kjint'ia<sub>q</sub> jndare xi mañujunni xi tjindukun nga kitsu: "Jabi!" **8** 'Ba 'batsa'en kiskutsijan 'ba tsa'bia<sub>q</sub> jngu chakabayu xi sinenda kji'i. 'Ba xi tijñakjare tjiubabiu, kui xi Kjuabeya 'mi, 'ba ngastun tjen xi Nga'ndere mik'en 'mi. 'Ba kika'ere kjua'ñu nga kuatexumare jngu yá xi ñujun ya ka'a xuta xi tjin ngasun'ndio, tuxi sikjesunni ko kjuachan, kjindia, chi'in 'ba ko tjiuba ts'en xi tjin ngasun'ndio.

**9** 'Ba kionga kitsijoya Ki'ndi borrego sello xi ma'ónni, tsa'bia<sub>q</sub> ngi'ndere altar isennixtjinre xuta xi kjinikjesun ngat'are nga kitsikja'axtiuya entre Na'enchana 'ba ngat'are nga kitsuyakixi ngat'are kui. **10** 'Ba ko jngu jnda xi 'ñu kinchja nga kitsu: "Ji Na'en xi tsje 'ba xi kjuakixi=, ¿kjia'a=ñu 'nda si'an\_ri kjua xuta xi tjin ngasun'ndio 'ba singojo\_ri kjuabeyani?" **11** 'Ba sa'e 'batsa'en nga jngu jngu kika'ere najñu tiba. 'Ba kik'inre nga tu chuba nixtjin sikja'aya ngisa, ka'nda nga kjuechu xkire xuta xi nts'e mani, xi 'ba nde tsa'exat'are Cristo 'ba xi 'ba nde 'batsa'en tjinnere nga kjuunik'en joni kui.

**12** 'Ba kionga kitsijoya Ki'ndi borrego sello xi majonni, kiskutsijan 'ba kuán jngu chon xi 'ñukjin. Kuajma tsu'biu joni najñu xi jma nistjen nistjen. 'Ba kua'ini na'enso joni jin. **13** 'Ba sa'e niñu xi

tjin ngank'aa tsixungi t'anangiu jo ma nga bixungi tu chi'ndere ya higuera kionga tsiteya jngu ntjo xi 'ñu. <sup>14</sup> 'Ba ngank'aa kichaja joni jngu xujun xi s'ekuya. 'Ba ngayéje nindu ko isla kiteya nga'ndere nga kitjuxin ña tjindu tsakaiñu.

<sup>15</sup> 'Ba sa'e rey xi tjin ngasun'ndio ko xuta titjun, xi ngakure chasoldadu, xuta nyina, nchja xi tjinre kjua'ñu 'ba ko ngatsi'i xuta ninga chu'nda xi tsindaña ninga xi bi chu'nda kik'endu'mo kioña tixa ngi ngijo 'ba ngajin naxire nindu. <sup>16</sup> 'Ba 'bi kitsure nindu ko naxiu: "Tixuneni 'ba tik'endu'monij, tuxi bi skuenini xi tijñasun yaxilio 'ba tuxi bi xianii kjuastire Ki'ndi borrego. <sup>17</sup> Ngat'a je= ja'e nixtjin nga kuakutsejen kjuastire xi niki 'ñu=, ¿'ba 'yá= xi kuan xukjuakore?"

## 7

### *Xuta xi tse'e Israel xi kis'et'are chubare Na'enchana*

<sup>1</sup> 'Ba nga je kuánni kibiu, tsa'biä ñujun ankje xi inyanduju nga ñujun ngatere ngasun'ndio. Xi inya'bechjare ntjo xi ndibani nga ñujun ngatere ngasun'ndio, tuxi bi nde kuisetjenni ntjo ngasun t'anangiu ninga ngajin ndachikun ninga nga'a ya xi tjin ngasun'ndio. <sup>2</sup> 'Ba tsa'be ngañaa kja'e ankje xi tjindibani ngituts'ian. Xi ya'a sell-ore Na'enchana xi tijñakun. 'Ba ankjebiu 'ñu kiski'ndayare ankje xi ñujun xi kika'ere kjua'ñu nga sikjetsun t'anangiu ko ndachikun tsakaiñu. <sup>3</sup> 'Ba 'bi kitsure: "Bi ba'e'ndio nga ntjo sikjetsun t'anangiu ko ndachikun 'ba ko ya xi tjin, yejerañu kje s'et'aáre chubare Na'enchana stjen xuta xi tse'e kui."

<sup>4</sup> 'Ba kjint'ia jó tjin kuán xi kis'et'a chubá, jngu sientu ko yachan ñujun mi kuán ngajinre ngatsi'i ntjere Israel xi tejó ka'a mani. <sup>5</sup> Kis'et'a chubá tejó mi xi ja'eni ntjere Judá, tejó mi xi tse'e Rubén, tejó mi xi tse'e Gad, <sup>6</sup> tejó mi xi tse'e Aser, tejó mi xi tse'e Neftalí, tejó mi xi tse'e Manasés, <sup>7</sup> tejó mi xi tse'e Simeón, tejó mi xi tse'e Leví, tejó mi xi tse'e Isacar, <sup>8</sup> tejó mi xi tse'e Zabulón, tejó mi xi tse'e Kuse, 'ba tejó mi xi tse'e Benjamín.

### *Xutankjin xi yaja najñu tiba*

<sup>9</sup> Nga je kuán kibi, kiskutsijan 'ba tsa'be ngañaa ñu nkjin xuta xi ni'yá ma 'bexki. Kui xi ndibanire ngayéje nangi xi tjin, ngayéje ntjere xuta xi tjin, ngayéje naxinanda xi tjin, ko xuta xi kja'e kjuanga en nchja. Xi inya ngankjain yaxilio 'ba ngixkun Ki'ndi borrego. Yaja najñu tiba 'ba ya'a xkajen ngayeje. <sup>10</sup> 'Ba ko jngu jnda xi 'ñu inyakji'ndaya nga inyatsu:

¡Ki'ndi borrego ko Na'enchana xi tijñasun yaxile,  
kui xi tsik'angina!

<sup>11</sup> 'Ba ngatsi'i ankje inyanduju ngandaire yaxilio, nchja chinga xi kañujun 'ba ko nga ñujun xi tjindukun. 'Ba kitsikindi nkjain ankjebiu ngankjain yaxilio nga kitsichjire Na'enchana. <sup>12</sup> 'Ba kitsu:

¡'Ba ngatjama!

Nikixiyaña nga Na'enchana tjinre kjuaje, kjua'ñu,  
nga'ñu 'ba ko kjuankjin kakun.

Ngatjanichjire, ngatja'yakun 'ba ngataba'ere  
kjuanda ka'nda ngantsjai nixtjin.

¡'Ba ngatjama!

**13** 'Ba sa'e jngu nchja chinga xi kañujun tsiningiyana:

—¿'Yá= xuta xi yaja najñu tiba? 'Ba ¿ñá=jendibani?

**14** —Ji= xi 'ye, na'en —kixin\_ra.

'Ba kui kitsunä ya'a:

—Kui= xi je ja'axtiu kjuanima xi 'ñu. Xi je yane 'ba kitsitiba najñure nga ko jinre Ki'ndi borrego. **15** Kui= kjua inyani ngankjain yaxilere Na'enchana 'ba nga nixtjin nga nistjen inyatsa'exat'are Na'enchana ngaya ningure. 'Ba xi tijñasun yaxilio, kui= xi k'uejñajinre 'ba sikuenda xutabiu. **16** Bi nde kuabojonire, ninga bi nde kuaxindanire, ninga bi nde kuakanire tsu'biu, ninga bi nde sistinire ndabo ngayeje. **17** Ngat'a Ki'ndi borrego xi sejña tiñare yaxilio, kui= xi sikuenda joni chutsanga 'ba kueko ña tjin nanda xi tsjare kjuabenichun xuta. 'Ba Na'enchana sixijun yeje ndaxkun nga jngu jngu.

## 8

### *Sello xi mayatuni*

**1** Kionga kitsijoya ngani Ki'ndi borrego sello xi mayatuni, masenru hora jña kuachun ngank'aa. **2** 'Ba tsa'biä yatu ankje xi inya ngixkun Na'enchana. Xi kika'ere yatu tjio.

**3** 'Ba sa'e ja'e kja'e ankje xi ja'ekasen ngankjain altar. Ya'a jngu nisu xi oro ni ña tiya tsajmi xi nda jen kanijnda. 'Ba tse tsajmi xi nda jen kanijnda kika'ere, tuxi sik'atjijinkonire xi nchja ngatsi'i xuta xi tse'e Na'enchana nga fako, nga sjare chje Na'enchana ngasun altar xi oro ni xi

klijñā ngankjain yaxilio. <sup>4</sup> 'Ba ni'ndire tsajmi xi nda jen kanijnda xi ts'atwijinkoni xi nchja xuta xi tse'e Na'enchana nga fako 'etjuni nisu xi tjiya ntsja ankje 'ba echu ña tijñā Na'enchana. <sup>5</sup> 'Ba sa'e ankje kiskjebé nisubiu 'ba kitsitse ndi'i x'i xi tjindusun altar 'ba 'etsojo ngasun t'anangiu. 'Ba Jane cho'on, kjinu'yare si'a, tsa'na ndi'i cho'on 'ba kuán chon ngayeje.

### *Tjio*

<sup>6</sup> 'Ba tsik'endunda ankje xi yatu nga sikjane tjiore. <sup>7</sup> 'Ba ankje xi titjun kitsikjane tjiore, 'ba kititsojo ngasun t'anangiu tsindijo ko ndi'i xi ts'atwijinkoni jin. 'Ba kití jngu yá xi ján ya ka'a t'anangiu, jngu yá xi ján ya ka'a ya xi tjin 'ba ko ngayéje xka xkjuen xi tjin.

<sup>8</sup> 'Ba ankje xi majóni kitsikjane tjiore, 'ba kichanikja'ajin ndachikun tsajmi xi 'bakji'i joni jngu ngijíñacha xi 'ñu je xi tití, 'ba jin kuán jngu yá xi ján ya ka'a ndachikun. <sup>9</sup> 'Ba jngu yá xi ján ya ka'a xi tjindukun ngajin ndachikun jesun, 'ba kjinikjekjua jngu yá xi ján ya ka'a barku xi kio tjin ngayeje.

<sup>10</sup> 'Ba ankje xi majánni kitsikjane tjiore, 'ba jngu niñu xi 'ñu je xi 'batsa'en titi joni ndi'i xi s'ekuya jendibani ngank'aa 'ba ja'ekejenjin jngu yá xi ján ya ka'a ndajio 'ba ngajinre ña titju nanda. <sup>11</sup> 'Ba niñubiu Sja 'mi, 'ba kuasja jngu yá xi ján ya ka'a nando. 'Ba nkjin xuta jesun ngat'a kjinisja nando.

<sup>12</sup> 'Ba ankje xi mañujunni kitsikjane tjiore, 'ba kjinikjetsun jngu yá xi ján ya ka'a tsu'biu, jngu yá xi ján ya ka'a na'enso 'ba jngu yá xi ján ya ka'a niñu xi tjin. 'Ba 'batsa'en kis'ejñu jngu ka'a tsu'biu,

na'enso ko niñu. Bi nde kitsitsejenni jngu yá xi jáñ ya ka'a nga nixtjin 'ba jngu yá xi jáñ ya ka'a nga nistjen.

<sup>13</sup> 'Ba sa'e kiskutsijan 'ba kjint'e jnda\_ra jngu tjiuja xi titutjen ngank'aa. 'Ñu kiski'ndaya nga 'bi titsu: “¡Nimaxuni, nimaxuni, nimaxuni xuta xi tjin ngasun'ndio, nga kjuane tgio xi yak'a, xi je mején sikjane ankje xi ngiján kichojo!”

## 9

### *Tgio xi ma'ónni*

<sup>1</sup> 'Ba ankje xi ma'ónni kitsikjane tjiore, 'ba tsa'biä jngu niñu xi jendibajenni ngank'aa nga ja'ekejensun t'anangiu. Xi kika'ere llavere nga'nde ña 'ñu nanga tixa. <sup>2</sup> 'Ba kionga kiskjex'a nga'nde ña 'ñu nanga tixa, 'etjunijin ni'ndi joni ni'ndi xi 'betjure jngu horno xi 'ñu je. 'Ba ni'ndi xi 'etjuni nga'nde ña 'ñu nanga tixa, kui xi 'echjare ndabare tsu'biu 'ba kitsijñu ntjo.

<sup>3</sup> 'Ba ngajin ni'ndibiu 'etjujinni naxkajndi xi ja'etsejin t'anangiu. 'Ba kika'ere kjua'ñu joni kjua'ñu xi tjinre chanuya xi tjin ngasun'ndio. <sup>4</sup> 'Ba kis'enere nga bi sikjetsun ngijña xi tjin t'anangiu ninga tsajmi xi xkjuen kun ninga ya xi tjin. Tu kui sani si'onre xuta xi bi kis'et'a stjen chübare Na'enchana. <sup>5</sup> Tunga bi kika'e'ndere nga sik'en xuta, tu kui sani nga ón sa sjare chajan. 'Ba chajan xi sjare, jo=ni chajan xi tsja chanuya kionga kjinere xuta. <sup>6</sup> 'Ba kui nixtjinbiu xuta kuangisjai kjuabeya, tunga bi kúasjaire. Kuamejénre kueya, tunga kjuabeyo kuasent'axinre.

<sup>7</sup> 'Ba naxkajndibiu 'batsa'en matsejen joni chakabayu xi je kis'enda nga kuaje kjuachan. 'Ba nindaku titsusunre joni corona xi oro ni, 'ba nkjain 'batsa'en matsejen joni nkjain xuta. <sup>8</sup> 'Ba ntsja ku, jo=ni ntsjare yanchjin. 'Ba nde'ñu jo=ni nde'ñu tjiuxa. <sup>9</sup> 'Ba tsajmi xi tji'more nisinre jo=ni kicha. 'Ba nga tutjen 'batsa'en fane jngare jotsa'en fane nga 'ñu nkjin chakabayu ko carreta inyamangat-sanga nga inyafi kjuachan. <sup>10</sup> 'Ba ndets'in tjinre nindu joni xi tse'e chanuya 'ba tjin=re kjua'ñu nga ón sa sjare chajan xuta. <sup>11</sup> 'Ba xi batexumare naxkajndibiu, kui= ankje xi tijñña nga'nde ña 'ñu nanga tixa. Xi Abadón 'mi nga en hebreo, 'ba nga en griego Apolión 'mi.

<sup>12</sup> Je= ja'a kjuana'en xi titjun, tunga ngijó chaja ngisa.

### *Tjio xi majonni*

<sup>13</sup> 'Ba ankje xi majonni kitsikjane tjiore, 'ba kjint'e\_ra jngu jnda xi kinchja ngamasenre turú xi ñujun mani xi tjindusun nga'nyure altar xi oro ni xi kjijñña ngixkun Na'enchana. <sup>14</sup> 'Ba jndabiu 'bi kitsure ankje xi majonni xi ya'a tjio: "Chjundai nga ñujun ankje xi tjitsut'a'ñu ngandaire ndaje xi 'ñu je xi Eufrates 'mi."

<sup>15</sup> 'Ba meni kichjunda ankje xi ñujun, tuxi sik'enni jngu yá xi jáñ ya ka'a xuta xi tjin. Ngu tu kui xa kis'endani nga 'ba sa'en kui chubabiu, nixtjinbiu, sa 'ba ko nu. <sup>16</sup> 'Ba kjint'ia jó tjin kuán chasoldadu xi tjenngire xi tjindukjare chakabayu: jó sientu millón kuán. <sup>17</sup> 'Ba joni tsa ngaya chini 'batsa'en tsa'biä chakabayu ko xi tjindukjare. 'Ba 'bi kun xi tjindukjare: nisinre

kji'more ko kicha xi 'batsa'en ini kji'i joni ndi'i, 'ba asu joni jacinto, 'ba sine joni asufre. 'Ba nindaku chakabayu 'ba kun joni ku tjiuxa. 'Ba ts'a inya'betju ndi'i, ni'ndi ko asufre. <sup>18</sup> 'Ba jngu yá xi jáñ ya ka'a xuta jesun ngat'are nga jáñ kjuana'enbi xi 'etju ts'a chakabayu, xi ndi'u, ni'ndiu ko asufre. <sup>19</sup> Ngat'a kjua'ñure chakabayu kis'e nga'a ts'a, tunga ndets'in kis'ere kjua'ñu ngayeje. Ngu ndets'in jo kun tjiuye, 'ba ko nindaku tsi'onnire xuta.

<sup>20</sup> Tunga xuta xi ts'angiu, xi bi kjinik'en ngat'are kjuana'enbiu, bi kuamejénre kitsik'antjaiya kjuafa'etsjenre nga tsikinyat'axinre na'en xi 'endakoni ntsja. Tusa janda kitsichjire isennixtjin xi tsa'exat'are chanayiu ko na'en xi kuandakoni oro, plata, bronce, ndiojo 'ba ko ya xi bi matsejenre ninga bi nt'e 'ba ninga bi ma fi. <sup>21</sup> 'Ba ninga bi kitsik'antjaiya kjuafa'etsjenre ngat'are nga tsik'en xuta, nga tsa'en kjuacha, kjuachajngi 'ba nga tsa'en cheje.

## 10

### *Ankje xi ya'a xujun chi xi ts'atjijunni*

<sup>1</sup> 'Ba tsa'be ngañaq kja'e ankje xi 'ñu tjinre kjua'ñu, xi jendibajenni ngank'aa. Xi ts'atjijunre yufi 'ba jngu cha'ya tijñasun nindaku. 'Ba nk-jain titsitsejen joni tsu'biu, 'ba ndsaku matsejen joni xjo xi xinyangire ni'ya xi tití. <sup>2</sup> 'Ba ngaya ntsja kjiya jngu xuju chi xi je kjitjundaya. 'Ba yasensun ndsaku kixi ndachikun 'ba ndsaku skjun yasensun t'anangiu. <sup>3</sup> 'Ba 'ñu kiski'ndaya

jotsa'en nu'yare jndare tjiuxo nga xuyare. 'Ba nga kiski'ndaya, yatu cho'on jane.

<sup>4</sup> 'Ba kionga je jane cho'on xi yatu, je si'indaä tsakaiñu, tunga kjint'ia jngu jnda xi jendibani ngank'aa xi kitsunaä: "T'ejña'mai xi kitsu cho'on xi yatu 'ba bi ni'indi enre."

<sup>5</sup> 'Ba jaskan ankje xi jngu ndsaku sejñasun ndachikun 'ba xi jngu sejñasun t'anangiu yejennk'a ntsja kixi. <sup>6</sup> 'Ba kitsja'enre nga ko ja'enre xi tijñakun ka'nda ngantsjai nixtjin, xi kitsa'en ngank'aa ko mé= xi tjin kio, t'anangiu ko mé= xi tjin kio, 'ba ko ndachikun ko mé= xi tjin kio. 'Ba kitsu: "Je bi nde k'uandaya ngisanire Na'enchana. <sup>7</sup> Ngat'a nga je kju'a'e nixtjin nga sikjane tjiore ankje xi mayatuni, kio= kuajngukjin xi 'ejña'mo Na'enchana. 'Ba kuan jotsa'en ja'ba je ye'ere nijmi nchja chinga profetare."

<sup>8</sup> 'Ba jnda xi ja'ba kjint'e\_ra, xi jendibani ngank'aa, jako nganinä 'ba kitsunaä: "T'in 'ba chjube xujun xi kkitjundaya, xi kjiya ntsja ankje xi jngu ndsaku sejñasunre ndachikun 'ba xi jngu sejñasunre t'anangiu." <sup>9</sup> Kui kju'a e kitsitiñat'ani\_ra ankjebiu 'ba tsi'a\_ra nga sjanä xujun chibiu. 'Ba kitsunaä: "Chjube 'ba chine. Nga'a ndsu'bai kuan joni ntsjen, tunga ngaya ngats'ai sja kuan."

<sup>10</sup> 'Ba 'batsa'en kiskjebia xujun chibiu xi kjiya ntsja ankje 'ba kiskinia. Nga'a ndsu'baä joni ntsjen kuán, tunga nga je kitjujian, sja kuán ngaya ngands'aa. <sup>11</sup> 'Ba jaskan kik'innaä: "Tjinne=re nga 'ba nde sikja'axtiuya ngani mé= xi 'enda Na'enchana ngat'are nkjin ntjere xuta, naxinanda, xuta xi nchja kja'e kjuanga en 'ba ko reyre."

# 11

*Xuta xi jó xi sikixiya ngat'are Na'enchana*

<sup>1</sup> 'Ba kika'enā jngu ya chubaq xi 'ba kji'i joni yanaxu, 'ba 'bi kik'innaaq: "T'in 'ba t'echubai ningure Na'enchana ko altare. 'Ba t'exki jó tjin mani xi kio inyatsichjire Na'enchana ngayeje. <sup>2</sup> Tunga bi 'bechubai nga'nde xi tijña ngandetsinre nengu, ngat'a kui= nga'ndebiu xi kitsa'ere naxinanda xi bi makjainre ngat'are Na'enchana. Xi yachan jó sa kuinyane naxinanda tsje. <sup>3</sup> 'Ba an sikasiqan jó xi sikixiya ngat'anā. Xi kuaja najñu kjue 'ba sikja'axtiuya ennā nde 'batjinni jngu mi ko jó sientu yachute ko te nixtjin."

<sup>4</sup> Ngojó xutabiu, kui ngojó ya olivo 'ba ngojó tsajmi xi s'endusun ndi'i lámpara xi inya ngixkun Na'enre ngasun'ndio. <sup>5</sup> 'Ba tsa tjin xi mejénre si'onre xutabiu xi jó, ndi'i= k'uetju ts'a xi kuaka xi mastike. 'Ba=tsa'en kjuinik'en tu'yañu xi mejénre si'onre. <sup>6</sup> Kui= xi kika'ere kjua'ñu nga k'uechja ngank'aa, tuxi bi nde kua'ani tsi jotjin nixtjin kua'ndayare nga sikja'axtiuya enre Na'enchana. 'Ba=nde kika'ere kjua'ñu nga sa'en nga nando kuan jin 'ba nga sikasenre ngasun'ndio ngayéje kuya kjuanima. Kuan 'ba sa'en jotjin ndiya mejénre.

<sup>7</sup> 'Ba kionga je kujngu xare ngojó xi tsikixiya ngat'anā, kui tjiuba xi ndibanijin nga'nde ña 'ñu nanga tixa, kui= xi skjanko, sa'enre 'ba sik'en. <sup>8</sup> 'Ba s'endu yojore mik'ion ngaya ndiya tere naxinanda jio, ña 'ba nde kis'et'a kru Na'enre. Xi tsure xuta naxinanda "Sodoma" 'ba ko nangi "Egipto" joni kusun. <sup>9</sup> 'Ba jáñ nixtjin masen kuekutsejen'a

yojore mik'ion ngatsi'i xutare naxinanda xi tjin, ntjere xuta xi tjin, xi nchja kja'e kjuanga en, 'ba ko xutare nangi xi tjin. 'Ba bi sjá'nde nga s'eyanijin yojore ngayeje. <sup>10</sup> 'Ba ngatsi'i xuta xi tse'e ngasun'ndio tsja kuanre ngat'are kjuabeyare. S'ere kjuatsja 'ba sjakañare kjuatjo xinkjin, ngat'a je jesun nchja chinga profeta xi jó xi kitsjare kjuasti.

<sup>11</sup> Tunga nga je ja'a jáñ nixtjin masen, Na'enchana kitsja nga'ñu nganire xutabiu 'ba kitsik'endukun ngani. 'Ba tsisetjen ngani, 'ba ngatsi'i xi tsabe 'ñu kitsakjun. <sup>12</sup> 'Ba 'batsa'en ngojó xi tsikixiya ngat'are Na'enchana kjint'e jngu jnda xi 'ñu tinchja, xi jendibajenni ngank'aa xi kitsure: “¡Ndibanijiun nga'e!” 'Ba jngu yufi tjenjin nga kinijinko ngank'aa yejerañu xi mastike kiskutsejen'a. <sup>13</sup> 'Ba ndekuini chubabiu ja'a jngu chon xi 'ñu, 'ba jekjua jngu yá ya xi mateni naxinando. 'Ba yatu mi xuta jesun. 'Ba xuta xi ts'angí 'ñu kitsakjun 'ba kitsikixiya nga tjinre kjuaje Na'enchana xi tijña ngank'aa.

<sup>14</sup> Je ja'a kjuanima xi majóni, tunga je matiña xi majánni.

### *Tjio xi mayatuni*

<sup>15</sup> 'Ba ankje xi mayatuni kitsikjane tjiore, 'ba kjinu'yare ngank'aa nkjin jnda xi 'ñu kinchja nga kitsu:

Ngasun'nde ña yatexuma xuta,  
je kuán nga'nde ña batexuma Na'enchana ko Cri-store,  
'ba kuatexuma ka'nda ngantsjai nixtjin.

<sup>16</sup> 'Ba nchja chinga xi kañujun xi tjindusun yaxilere ngixkun Na'enchana kitsikindi nindaku

'nda t'anangiu 'ba kitsichjire Na'enchana <sup>17</sup> 'ba 'bi  
kitsu:

Teba'e=r̄i kjuanda, ji Naini,  
Na'en xi tijñā 'ba tsik'ejñā,  
xi tse'e ngayéje kjua'ñu xi tjin.  
Ngat'a je tenichjen kjua'ñuri xi je,  
'ba je te'betuts'in\_ri nga tebatexumai.

<sup>18</sup> 'Ba je= kuastire naxinanda xi tse'e ngasun'ndio,  
tunga je= ja'e nixtjin nga kuakui kjuastiri xi je,  
chubaq̄a nga kuanre kjua xuta xi je jesun,  
'ba kua'eri chjire xi 'bakore xuta xi tsiji,  
nchja chinga profeta ko xuta tsje xi tsiji  
'ba ko ngatsi'i xi bekun ja'enri,  
ninga xi tjinre kjua'ñu ninga xi njima.  
'Ba sikjeni xi inyatsikjetsun ngasun'ndio.

<sup>19</sup> 'Ba 'batsa'en kitju'i ningure Na'enchana xi  
kjijñā ngank'aa, 'ba ngaya ningu kji'yare kaxa xi  
bakutsejen nga Na'enchana 'endako kjua xuta xi  
tse'e. 'Ba tsa'na ndi'i cho'on, 'ba kis'e si'a, jane  
cho'on, kuán jngu chon, 'ba 'ñu tsa'a tsindijo.

## 12

### *Chjun ko tjiuye xi yatu ku*

<sup>1</sup> 'Ba jaskan kuatsejen ngank'aa jngu chuba je  
xi yakutsejen mé= xi kuan. Kji'yare jngu chjun xi  
ts'atjijunre tsu'biu joni najñu, 'ba na'enso kis'ejñā  
ngi ndsaku, 'ba tejó niñu tjisunre nindaku joni  
corona. <sup>2</sup> 'Ba tji'yamore 'ba chajanre ki'ndiu  
tiki'ndayako. Tifa'a kjuanima nga s'ere ki'ndi.

<sup>3</sup> 'Ba jaskan kuatsejen ngani ngank'aa kja'e  
chuba xi yakutsejen mé= xi kuan. Kji'yare jngu  
tjiuye je xi ini kji'i. Xi tjinre yatu nindaku 'ba te

turu, 'ba jngu corona tjisunre nga jngu jngu nindaku. <sup>4</sup> 'Ba ko ndets'in kiskjefejenya jngu yá xi jáñ ya ka'a niñu xi tjin ngank'aa 'ba kiskanikja'a ngasun t'anangiu. 'Ba tjiuyebiu xi yatu ku tsakasen ngixkun chjunbiu xi je mején s'ere ki'ndi, tuxi skineni ki'ndiu kionga je tsin.

<sup>5</sup> 'Ba chjunbiu kis'ere jngu ki'ndi xi'in. Xi je 'batjinni nga kuatelexumare ngayéje naxinanda xi tjin ngasun'ndio ko jngu yaníse xi kicha kuan-dani. Tunga ki'ndiu kitukja'axin 'ba kichanire Na'enchana ña nga tijña yaxilare. <sup>6</sup> 'Ba chjunbiu tsanga 'ba kiji nangi t'axin ña Na'enchana 'endare jngu nga'nde, tuxi kio satesinnire jngu mi ko jó sientu yachute ko te nixtjin.

<sup>7</sup> 'Ba jaskan kis'e jngu kjuachan ngank'aa, ña ankje xi Miguel 'mi ko ankje xi tjenko kiskjanko tjiuye xi yatu ku. 'Ba kiskjan tjiuyebiu ko ankje xi tjenko, <sup>8</sup> tunga kitsichaja tjiuyebiu 'ba bi nde kuán tsik'endu ngisani ngank'aa. <sup>9</sup> Ngu tsichuxje tjiuye jebiu, tjiuye chingo xi chanayi 'mi, xi 'ba nde Satanás 'mi ngayeje, xi 'bonachare ngatsi'i xuta xi tjin ngasun'ndio. Kui 'ba ko ankjere tsichujenngi ngasun'ndio.

<sup>10</sup> 'Ba 'batsa'en kjint'e\_ra jngu jnda xi 'ñu kinchja ngank'aa xi 'bi kitsu:

Nganda'e sik'angi= Na'enchana xuta xi tse'e,  
kuakutsejen kjua'ñure 'ba kuatelexuma,  
'ba Cristore sikjen kjua'ñure.

Ngat'a je= tsichuxjejin xi baneje nts'ia,  
xi nga nixtjin nga nistjen baneje ngixkun  
Na'enchana.

<sup>11</sup> Ngat'are jinre xi 'esten Ki'ndi borrego kitsa'en  
nts'ia,

'ba ngat'are en xi kui kitsuyakixi,  
ngat'a bi kitsakjun nga kueya.

<sup>12</sup> 'Bamani titsja\_ru yojonu xi tetsubo ngank'aa.  
Tunga nimaxunu jun xi tetsubo t'anangiu  
'ba ngajin ndachikun,  
ngat'a je ja'ejenkunnu chanayiu,  
'ba 'ñu kuastire,  
ngat'a be= nga chuba nixtjin tijñña ngisare.

<sup>13</sup> 'Ba nga je tsabe tjiuye jebiu nga je  
kichanikja'jen ngasun t'anangiu, kitjenngi  
chjun xi kis'ere ki'ndi xi'in. <sup>14</sup> Tunga kika'ere  
chjunbiu jó jnga joni xi tse'e tjiuja tse, tuxi kuan  
kuasent'axin kjinnire tjiuye jebiu nga stutjen  
nga'nde xi je kis'endare nangi t'axin ña sátesinre  
ján nu masen. <sup>15</sup> 'Ba sa'e ts'a tjiuye jebiu ts'axje  
nanda joni jngu ndaje, tuxi nandabiu skjefeni  
chjunbiu. <sup>16</sup> Tunga t'anangiu tsakaseko chjunbiu.  
Ngu kitju'i jngu ngojo nangiu ña ja'as'en ndaje xi  
ts'axje ts'a tjiuye jebiu. <sup>17</sup> 'Ba meni 'ñu kuastike  
tjiuye jebiu chjunbiu 'ba kiskjanko ntjere xi yak'a,  
xuta xi tsik'etjusun kjuatexumare Na'enchana 'ba  
xi kixi 'bejñatjo xi kitsuya Jesucristo. <sup>18</sup> 'Ba tjiuye  
jebiu tsik'ejñña ndai ndachikun.

## 13

### *Tjiuba xi jó*

<sup>1</sup> 'Ba tsa'biä jngu tjiuba xi ti'betukajin  
ndachikun xi yatu mani nindaku 'ba te mani  
turúre. 'Ba nga jngu jngu turúre titsusunre corona.  
'Ba nde nga jngu jngu nindaku tjitsut'a ja'en xi  
ch'o tsure Na'enchana. <sup>2</sup> 'Ba tjiuba xi tsa'biä 'ba=  
kj'i joni tjiuxa. 'Ba ndsaku 'ba= kun jo=ni ndsaku

oso, 'ba ts'a jo=ni ts'a tjiuxa. 'Ba tjiuye jio kitsjare tjiubabiu kjua'ñure ko yaxilere 'ba ko xare, tuxi kuatexumani. <sup>3</sup> 'Ba tsa'biā nga kjini'onre jngu nindaku tjiubabiu 'ba 'batsa'en 'yare joni tsa sik'enre tsakaiñu, tunga je kuanda ña onre. 'Ba meni ngatsi'i xuta xi tse'e ngasun'ndio kuakunre 'ba kitjenngi tjiubabiu. <sup>4</sup> 'Ba kitsichjire tjiuye jebiu, ngat'a je kitsjare kjua'ñure tjiubabiu nga kui kuatexuma. 'Ba 'ba nde kitsichjire tjiubabiu nga 'bi kitsu: "Ni'yá tjinre kjua'ñu xi 'batsa'en je joni xi tse'e tjiubabiu. Ni'yá kuan skjanko 'ba sa'enre."

<sup>5</sup> 'Ba kika'e'ndere tjiubabiu nga kuan nk'a k'uaxje yojore ngat'are kjua'ñure 'ba nga kuinchja en xi ch'o tsure Na'enchana. 'Ba kitsa'ere kjua'ñu nga yachan jó sa kuatexuma. <sup>6</sup> 'Ba meni kinchja en xi tsi'onre Na'enchana. Ch'o kitsure ja'enre Na'enchana ko nga'nde ña tijña 'ba ko ngat'are ngatsi'i xi tjin ngank'aa. <sup>7</sup> 'Ba nde kika'e'ndere nga skjanko xuta tsje xi tse'e Na'enchana 'ba nga sa'enre. 'Ba kika'ere kjua'ñu nga kuatexumare ngatsi'i ntjere xuta xi tjin, naxinanda xi tjin, xutare nangi xi tjin 'ba ko xuta xi nchja kja'e kjuanga en. <sup>8</sup> 'Ba ngatsi'i xuta xi tse'e ngasun'ndio, xi bi kua'indut'a ja'enre xujunre Ki'ndi borrego xi kjinik'en, kitsichjire tjiubabiu. Ngat'a nga kje majín ngasun'ndio, ngatsi'i xi k'uendukunntsjai kua'indut'a ja'enre xujunre Ki'ndi borrego.

<sup>9</sup> Xi tjin ñojon ngatasen ñojon.

<sup>10</sup> Xi je 'batjinni nga nduya kuaje,  
kui= xi kuaje nduya.

'Ba xi je 'batjinni nga kicha kjuunik'enkoní,  
kui= xi kicha kueya=ni.

Kio= machjen nga xukjuakore xuta tsjere  
 Na'enchana 'ba nga kixi inya ngat'are  
 kjuamakainre.

<sup>11</sup> 'Ba jaskan tsa'be ngañaa kja'e tjiuba xi  
 ti'betukanijin nangiu. Tjinre jó turu joni tse'e  
 ki'ndi borrego, tunga 'batsa'en nchja joni tjiuye  
 jio. <sup>12</sup> 'Ba tjinre ngayéje kjua'ñure tjiuba xi titjun  
 'ba tibatexuma ngixkun. Titsa'en nga xuta xi tse'e  
 ngasun'ndio sichjire tjiuba xi titjun, xi kuanda ña  
 onre xi 'batsa'en 'yare joni tsa sik'enre tsakaiñu.  
<sup>13</sup> 'Ba nde titsa'en kjuakun ya'e, ka'nda ngixkun  
 xuta titsikasenjen ndi'i ngank'aa 'nda t'anangiu.  
<sup>14</sup> 'Ba ngat'are nga kika'e'ndere nga sa'en kjuakun  
 ngixkun tjiuba xi titjun, ti'bonachare xuta xi  
 tse'e ngasun'ndio. 'Ba 'enere xuta nga sinda jngu  
 isenre tjiuba xi tijñakun nisi tsa je kjini'onkonire  
 kicha.

<sup>15</sup> 'Ba kika'e'ndere tjiuba xi majóni nga  
 sik'ejñakun isenre tjiuba xi titjun, tuxi kuan  
 kuinchjani 'ba 'batsa'en kuan k'uexa nga  
 kjuunik'en ngatsi'i xi bi sichjire kui. <sup>16</sup> 'Ba kitsa'en  
 nga s'et'are chubaq ntsja kixi asa stjen ngatsi'i  
 xuta, xi tjinre kjua'ñu asa xi njima, xi nyina asa  
 xi tsajainre tsajmi, xi xuta ndai asa chu'nda xi  
 tsindaña. <sup>17</sup> 'Ba ni'yá kuán tsatse tsajmi asa yateña  
 tsa tsajainre chubabiu, xi ja'enre tjiubabiu asa  
 numerore ja'enre.

<sup>18</sup> Kibi kjuankjin kakun machjenre. Xi  
 mankjinre ngat'axje numerore tjiubabiu, ngat'a  
 kui= xi numerore ja'enre jngu xuta. Kui= xi jon  
 sientu masen ko tjio'on jngu.

# 14

*Ki'ndi borrego ko xi jngu sientu ko yachan ñujun mi*

<sup>1</sup> 'Ba jaskan kiskutsijaq 'ba tsa'biq Ki'ndi borrego nga sejñasun tjengi xi Sión 'mi. 'Ba kio inyat'are jngu sientu ko yachan ñujun mi xuta xi kua'indut'a stjen ja'enre Ki'ndi borrego ko ja'enre Na'enre Ki'ndi borrego. <sup>2</sup> 'Ba kjint'e\_ra jngu jnda xi jendibani ngank'aa, xi 'batsa'en jane jotsa'en fane ña ntjai nanda asa jotsa'en fane nga 'ñu fane cho'on. Jndabiu jo=ni tsa 'ñu nkjin xuta inyatsik-jane najni arpa.

<sup>3</sup> 'Ba inyase jngu son xatse ngankjain yaxilio, nga ñujun xi tjindukun 'ba ko nchja chinga xi kañujun. Tu'yá kuán kise ngisa sonbiu, tu kui sani xuta xi jngu sientu ko yachan ñujun mi xi ts'angi ngajinre xuta xi tjin ngasun'ndio. <sup>4</sup> Kui xutabiu kui xi bi kitsijndiko yojore yanchjin nga nisa jngu ndiyajín tsik'enduko chjun, xi fitjenngi Ki'ndi borrego tuña ña kui fi. Kui xi ts'angi ngajinre xuta 'ba 'ba= nguyare joni tu xi tjun macha, chje xi ba'ere Na'enchana ko Ki'ndi borrego. <sup>5</sup> Nimé en ndesu kinchja, ngu tsje ngixkun Na'enchana.

*En xi kitsu ankje xi jáñ*

<sup>6</sup> 'Ba jaskan tsa'be ngañaq kja'e ankje xi titutjen ngank'aa nga ndibako jngu en xatse xi bi fet'a. Xi sikja'axtiuyare xuta xi tjin ngasun'ndio, ngayéje naxinanda xi tjin, ngayéje ntjere xuta xi tjin, xutare nangi xi tjin 'ba ko xuta xi nchja kja'e kjuanga en. <sup>7</sup> 'Ñu kinchja ankjebiu nga 'bi kitsu: "Chakun Na'enchana 'ba tikixiyo nga kui tjinre kjuaje, ngat'a je= ja'e chubá nga sa'en

kjua. Tichji\_ru xi kitsa'en ngank'aa, t'anangiu, ndachikun ko nga'nde ña tju nanda.”

<sup>8</sup> 'Ba jaskan kuatsejen kja'e ankje, xi majóni, xi 'bi kitsu: “Je= kjinikjekjua, je= kjinikjekjua naxinanda je xi Babilonia 'mi, ngat'a kitsa'en kjuachajngi nga mejénre tsitsjare yojo. 'Ba kitsa'en nga naxinanda xi yak'a kjuatjenni kusunre. 'Ba 'batsa'en kitsich'i ngatsi'i xutare nangi xi tjin ko xanre kjuachajngire.”

<sup>9</sup> 'Ba jaskan kuatsejen ngani kja'e ankje. Xi majánni xi 'ñu kinchja nga 'bi kitsu: “Tsa tjin xi sichjire tjiubabiu ko isenre, asa sja'nde nga s'et'are chubare stjen asa ntsja, <sup>10</sup> kui xi tjinnere nga saku yejere kjuasti jere Na'enchana. 'Ba 'ba kuanre jo mare xi 'bi yeje xan xi bi kichjuen nga'ñure. 'Ba ndi'i ko asufre kjua'ajin kjuanima ngixkun ankje tsjere Na'enchana 'ba ngixkun Ki'ndi borrego. <sup>11</sup> 'Ba nj'ndire ndi'i xi tsikja'a kjuanima timijin ka'nda ngantsjai nixtjin. 'Ba nga nixtjin nga nistjen tsajain kjuanikja'ayare xi tsichjire tjiubabiu ko isenre 'ba xi sakure chubare ja'enre.”

<sup>12</sup> Kio= machjen nga bi sikjere kakun xuta tsjere Na'enchana, xi tsik'etjusun kjuatexumare 'ba xi kixi fitjenni Jesús.

<sup>13</sup> 'Ba kjint'e\_ra jngu jnda xi jendibani ngank'aa xi 'bi kitsuna: “Ti'indi kibi: jNdaxure xuta xi kueya nga tujngu mako Na'enna ba'anire 'nda nganda'e!”

'Ba Isennixtjintsjere Na'enchana tsu: “Jun. Kui xi sikja'aya ngat'are kjuanima xi kisakure nga 'ñu kitsa'exa. Ngat'a xa xi kitsa'en kuakutsejen 'yá= kuán kui nga kjuechu jan.”

*Nixtjin nga kuacha xi tjintje ngasun'ndio*

<sup>14</sup> 'Ba jaskan kiskutsijaan 'ba tsa'biā jngu yufi tiba. 'Ba ngasun yufiu tijñasun jngu xi 'batsa'en matsejen joni xuta, 'ba tjisunre jngu corona xi oro ni. 'Ba ngaya ntsja kjiya jngu kicha yojó joni xi machjen nga ti trigo. <sup>15</sup> 'Ba ningu xi kjijña ngank'aa 'etjuni kja'e ankje xi 'ñu kinchja nga 'bi kitsure xi tijñasun yufiu: "Je kuacha xi tjintje ngasun'ndio. Tichakuai kichari chon 'ba t'ekui, ngat'a je= ja'e chubá̄ nga s'ejñatjo chon." <sup>16</sup> 'Ba 'batsa'en xi tijñasun yufiu tsateko kichare mé= xi tjintje ngasun'ndio, 'ba kis'eku chanre ngasun'ndio.

<sup>17</sup> 'Ba jaskan 'etju ngani kja'e ankje ningu xi kjijña ngank'aa xi 'ba nde ya'a jngu kicha yojó ngayeje. <sup>18</sup> 'Ba ña kjijña altar 'etju kja'e ankje, xi batexumare ndi'u. Xi 'ñu kinchja nga 'bi kitsure xi ya'a kicha yojó: "Kicha yojóri tichakoni enre uva xi tjin ngasun'ndio, ngat'a je= ja'e chubá̄ nga sti uva." <sup>19</sup> 'Ba 'batsa'en ankjebiu tsatekoní kicha yojóre uva xi tjin ngasun'ndio, 'eku 'ba 'etsojoya nga'nde ña nits'iungi, xi tsunire nga'nde ña kuakutsejen kjuasti jere Na'enchana. <sup>20</sup> 'Ba kjinit'siungi uvabiu ngandaire naxinando. 'Ba nga'nde ña kjinit'siungi, jin 'etjuni. 'Ba jiun tsijin jo kji'i nk'a ka'nda ngi'ba chakabayu, 'ba jánu sientu kilómetro nga teya.

## 15

*Ankje xi ya'a kjuana'en xi fet'ani*

<sup>1</sup> 'Ba jaskan tsa'be ngañaā ngank'aa kja'e chubá̄ je xi makunna, xi yaku mé= xi kuan. Tsa'biā yatu

ankje xi ya'a yatu kjuana'en xi fet'ani, 'ba kionga je kuan kibiu, je kjuet'a kjuasti jere Na'enchana.

<sup>2</sup> 'Ba nde tsa'bia tsajmi xi matsejen joni jngu ndachikun xi chutsin ni xi ts'atijiinkoni ndi'i. 'Ba ngandaire ndachikun chutsiun inyanduju xuta xi kiskjanko tjiubabiu 'ba kitsa'enre. Ngat'a bi kitsichjire isenre tjiubabiu ninga bi kitsja'nde nga kis'et'are numerore ja'enre. Kui xutabiu ya'a najni arpa xi Na'enchana kitsjare. <sup>3</sup> 'Ba inyase sonre Moisés, jngu xi kitsa'exangire Na'enchana, 'ba inyase sonre Ki'ndi borrego. 'Ba inyatsu: Ji Nainj, Na'en xi tse'e ngayéje kjua'ñu xi tjin, 'ñu= ya'e xi kjiñe'en 'ba makun=ni.

Kixi 'ba kjuakixi= ndiya xi tsiji.

Ji=ni reyre nangi xi tjin.

<sup>4</sup> Ngatsi'i xuta tjinne=re nga sákjunkeri, Nainj. Ngatsi'i xuta tjinne=re nga sikixiya nga je ja'enri. Ngat'a tu ji sani xi tsjekjin.

Ngatsi'i xuta xi tjin ngasun'ndio kjua'e= ngixkuin nga sichjiri,  
ngat'a je= kji'yare nga kixi ñe'en kjua.

<sup>5</sup> 'Ba nga je kuán kibiu, tsa'bia nga kichju'i ningu xi kjijña ngank'aa, xi bakutsejen nga Na'enchana 'endako kjua xuta xi tse'e. <sup>6</sup> 'Ba ningu 'etjuni ankje xi yatu xi ya'a kjuana'en xi yatu. Yaja najñu tiba xi tsje xi tiba'na, 'ba nisinre titsukjare tjiuxinjnde xi oro ni.

<sup>7</sup> 'Ba jngu xi ñujun xi tjindukun kitsjare nga jngu jngu ankje xi yatu jngu nisu xi oro ni xi kitse kjuasti jere Na'enchana xi tijñakun ka'nda ngantsjai nixtjin. <sup>8</sup> 'Ba kitse ningu ni'ndi xi jendibanire kjujere ko kjua'ñure Na'enchana, 'ba ni'yá kuán

ja'as'en ningu 'nda nga jet'a kjuana'en xi yatu xi ya'a ankje xi yatu.

## 16

### *Nisu xi inya kjuana'en xi yatu*

<sup>1</sup> 'Ba jaskan kjint'e\_ra jngu jnda xi 'ñu kinchja, xi jendibani ningu. 'Ba kitsure ankje xi yatu mani: "Tangik'estenjiun ngasun'ndio xi inya nisu xi yatu, xi kjuasti jere Na'enchana."

<sup>2</sup> 'Ba meni ankje xi titjun kik'estensun t'anangiu xi inya nisure. 'Ba xuta xi kis'let'are chubare tjuibabiu 'ba xi kitsichjire isenre, kuatsejenne tse xi ch'o xi tsikja'a 'ñu tse kjuanima.

<sup>3</sup> 'Ba jaskan ankje xi majóni 'estejin ndachikun xi inya nisure. 'Ba ndachikun jin kuánni joni jinre xuta mik'en. 'Ba jesun ngayéje xi tjindukunjin ndachikun.

<sup>4</sup> 'Ba jaskan ankje xi majánni 'estejin ndajio ko nga'nde ña tju nanda xi inya nisure. 'Ba jin kuán.

<sup>5</sup> 'Ba kjint'ia\_ nga 'bi kitsu ankje xi batexumare nando: "Ji, Na'en, xi tsjekjin xi tijña 'ba tsik'ejña, kixi= teñe'en nga 'bitsa'en teñe'en kjua. <sup>6</sup> Ngat'a kui xutabiu 'esten jinre xuta tsjeri 'ba ko tse'e profeta. 'Ba nganda'e, ji kjiñe'en nga tjinnere k'ui jin. 'Ba=tsa'en machjenre."

<sup>7</sup> 'Ba nde kjint'e\_ra ngijngu jnda xi jendibani ña tijña altar xi 'bi kitsu: "Jun, Na'en, xi tse'e ngayéje kjua'ñu xi tjin, ji xi kixi ñe'en kjua nga ko fani kjuakixi."

<sup>8</sup> 'Ba jaskan ankje xi mañujunni 'esten ngasun tsu'biu xi inya nisure. 'Ba kitsa'en nga tsu'biu nga ko ndi'i kuakakoni xuta. <sup>9</sup> 'Ba 'ñu kití

xuta ngat'are ndi'u, tunga ninga 'ba kuánre, bi kitsik'antjaiya kjuafa'etsjenre 'ba bi kitsikixiya nga Na'enchana tjinre kjuaje. Tusa ch'o kitsure ja'enre Na'enchana xi tjinre kju'a'ñu nga sja asa skja'axin kjuana'enbiu.

**10** 'Ba jaskan ankje xi ma'ónni 'esten xi inya nisure ngasun yaxile ña batexuma tjiubabiu. 'Ba kuajñu yeje ña batexuma tjiubabiu. Kiskineya najenre xuta ngat'are kjuanima xi inyafa'a. **11** Tunga tojo bi kitsik'antjaiya kjuafa'etsjenre ngat'are kjuach'o xi inyatsa'en. Tusa ch'o kitsure Na'enchana xi tijña ngank'aa ngat'are kjuanima xi inyafa'a 'ba ngat'are tse xi yajun yojore.

**12** 'Ba jaskan ankje xi majonni 'estejin ndaje je xi Eufrates 'mi xi inya nisure. 'Ba ndajio kixi, tuxi skjex'a'ndenire nga kju'a'e nchja rey xi ndibani ngituts'ian.

**13** 'Ba tsa'biā ján isennixtjin ch'o xi matsejen joni naxkje xi ti'betjuni ts'a tjiuye jio, ts'a tjiuba xi majóni 'ba ko tse'e profeta ndesu. **14** Kui isennixtjin ch'obiu tsa'exat'a=re chanayiu nga tsa'en kjuakun 'ba inya'betju nga k'ueku rey xi tjin jo kji'i ngasun'ndio, tuxi k'uendundani nga skjanko Na'enchana. Ngat'a s'e= kjuachan nixtjin je nga kuakutsejen yojore Na'enchana xi tse'e ngayéje kju'a'ñu xi tjin.

**15** “Chutsijon, an kju'a'e=ñä joni chacheje. ¡Ndaxure xi tijñakun xi tijñanda najñure, tuxi bi k'ujame kjistini 'ba bi k̄asubare nga xiare!”

**16** 'Ba nga ján isennixtjin ch'o 'eku reybiu nga'nde xi Armagedón 'mi nga en hebreo.

**17** 'Ba jaskan ankje xi mayatuni 'esten ngajin isen xi inya nisure. 'Ba kjinu'yare jngu jnda xi ne 'ñu kinchja, xi jendibani ningu ña sejña yaxilere Na'enchana nga batexuma. "Je kua-jngu", kitsu jndabiu. **18** 'Ba 'batsa'en tsa'na ndi'i cho'on, kis'e si'a, jane cho'on, 'ba kuán jngu chon xi niki 'ñu=. Xi nisañajanni ma 'ndani nga xuta tjin ngasun'ndio, ngat'a niki 'ñu kuán chonbiu. **19** 'Ba jáñ ya 'etju naxinanda jio nga tsakjanya, 'ba kjinikjekjua naxinanda xi tjin ngasun'ndio. 'Ba Na'enchana ja'etsjen yejere kjuach'o xi kitsa'en naxinanda je xi Babilonia 'mi 'ba kitsa'en nga k'ui xi kitse chutsin, xi kjuasti jere. **20** 'Ba kichajajin isen ngayéje isla xi tjin, 'ba ngayéje nindu bi nde kji'yanire. **21** 'Ba ngank'aa jendibani tsindijo ya'e xi tsixunere xuta, xi iyeru ts'axtiu yachan kilo. 'Ba xuta ch'o kitsure Na'enchana ngat'are kjuana'en xi tse'e tsindijo, ngat'a kjuana'en jebiu kitsikja'a 'ñu tse kjuanima.

## 17

### *Kjuanima xi kisakure chjun masion*

**1** 'Ba kitsitiñat'ana jngu ankje xi s'ejñajinre ankje xi yatu, ankje xi ya'a jngu nisu xi yatu tsakaiñu. 'Ba 'bi kitsunä: "Jabi. Kuakura jótsa'en si'anre kjuua chjun masen xi nda 'yare, xi tijñat'are nkjin ndaje ya'e. **2** Rey xi tjin ngasun'ndio kitsa'enko kjuachajngi chjunbiu, 'ba xuta xi tse'e ngasun'ndio kuach'i ko xanre kjuachajngire."

**3** 'Ba jaskan ja'ejin nganina Isennixtjintsjere Na'enchana 'ba kikonä ankje nangi t'axiun. 'Ba kio tsa'bia jngu chjun xi tijñakjare jngu tjuba xi ini

kji'i xi kitsejunre ja'en xi ch'o tsure Na'enchana. Yatu= mani nindaku 'ba te mani turúre. <sup>4</sup> 'Ba chjunbiu yaja najñu xi kuán kji'i 'ba ini koni, 'ba kitsejunre oro 'ba nkjin kuya ndiojo xi tsjakun. 'Ba ngaya ntsja ya'a jngu chutsin xi oro ni xi kitse kjuanayi ko xi jndi ngixkun Na'enchana, xi tsunire kjuachajngire chjunbiu. <sup>5</sup> 'Ba stjen kua'indut'a jngu ja'en xi tu'yá mankjinre. 'Bi tsa'en kua'indut'a: "Naxinanda je xi Babilonia 'mi, nare yanchjin masen 'ba nare ngayéje kjuanayi xi tjin ngasun'ndio." <sup>6</sup> 'Ba tsa'biä nga chjunbiu ch'i nga kits'i jinre xuta tsjere Na'enchana ko xi tse'e xuta xi kitsuyakixi ngat'are Jesucristo. Kionga tsa'biä, 'ñu kuakunna.

<sup>7</sup> "¿Ánñu makunniri?", tsiningiyana ankjebiu. "Xinyara jó tsunire ngat'are chjunbiu ko tjiuba xi tijñakjare, xi yatu mani nindaku 'ba xi te mani turúre. <sup>8</sup> Tjiuba xi kji'ye, kui xi tsik'ejña tsakaiñu tunga bi nde tijñakunni nganda'e. Tunga je mején k'uetukanijin=ni nga'nde ña 'ñu nanga tixa 'ba kuaje ña niki chajakjin. 'Ba xuta xi tse'e ngasun'ndio, xi bi kua'indut'a ja'enre xujun xi tsu 'yá= xi k'uendukunntsjai xi kua'indu nga kje majín ngasun'ndio, kyuakun=re nga skue tjiuba xi tsik'ejña tsakaiñu tunga bi nde tijñakunni nganda'e 'ba xi kjua'e ngani.

<sup>9</sup> 'Kibi= xi kjuankjin kakun machjenre. Nindaku xi yatu, kui xi tsunire nga yatu tjengi xi tijñasun chjunbiu 'ba 'ba=nde tsunire yatu rey ngayeje. <sup>10</sup> Ón reybi je jesun, jngu xi tjin ngisare xa nganda'e, 'ba jngu xi kje fa'ejín, tunga bi tse kuanre xare nga kjua'e. <sup>11</sup> 'Ba tjiuba ini xi tsik'ejña

tsakaiñu tunga bi nde tijñakunni, kui rey xi majinni, tunga 'ba nde tse'e xi yatu ngayeje. 'Ba kuaje ña chajakjin.

<sup>12</sup> ''Ba turú xi te mani xi kji'ye, kui xi tsunire nga te rey xi kje ba'e xajínre. Tunga kua'exa=re nga kuatexuma jngu hora sa joni rey 'ba ñatjen kuatexumako tjiubabiu. <sup>13</sup> Kui xi tujngu kuan 'ba sjare tjiubabiu kjua'ñure ko xa xi tjinre. <sup>14</sup> 'Ba ñatjen skjanko Ki'ndi borrego, tunga Ki'ndi borrego sa'enre, ngat'a kui= xi Naire nai 'ba Reyre rey. 'Ba xuta xi tujngu ma Ki'ndi borrego, kui= xi kjinukjuare, xi kichja'ajin 'ba xi kixi tjenngire.''

<sup>15</sup> 'Ba ankje 'ba nde kitsuyanaq ngayeje: "Ndaje xi nkjin mani xi kji'ye, ña tijñat'are chjun masenbiu, kui xi tsunire xutare nangi xi tjin, xutankjin, xuta xi nchja kja'e kjuanga en, 'ba ko naxinanda xi tjin. <sup>16</sup> 'Ba turú xi te mani 'ba ko tjiuba inibiu xi kji'ye kuestike chjun masenbiu. Skja'axin yejere xi tjinre, sikasti, skine yojore chjunbiu, 'ba ko ndi'i kuakani xi 'bangi. <sup>17</sup> Ngat'a Na'enchana je 'ejñajin inimare turú xi te nga sa'en xi mejénre. Kui kjua tu jngu kuan 'ba sja'ndere tjiuba inibiu nga kui xi kuatexuma 'nda nga k'uetjusun en xi kitsu Na'enchana. <sup>18</sup> 'Ba chjunbiu xi kji'ye, kui xi tsunire naxinanda je xi batexumare rey xi tjin jo kji'i ngasun'ndio."

## 18

*Jotsa'en kjinikjekjua naxinanda je xi Babilonia 'mi'*

<sup>1</sup> Nga je kuán kibiu, tsa'be ngañaq kja'e ankje xi jendibajenni ngank'aa. Kui xi 'ñu tse kjua'ñu

tjinre, 'ba ngasun'ndio kua'isen ngat'are kjua-jere ankjebiu. <sup>2</sup> 'Ba 'ñu kinchja nga kitsu: "Je= kjinikjekjua, je= kjinikjekjua naxinanda je xi Babilonia 'mi. Je kuán ndaba isennixtjin xi tsa'exat'are chanayiu 'ba nga'nde ña tjindu ngayéje isennixtjin ch'o xi tjin. Je kuán ndaba ngatsi'i tjiunise xi jndi ngixkun Na'enchana ko tjiunise xi masticha. <sup>3</sup> Ngu xuta xi tse'e ngayéje nangi xi tjin ngasun'ndio je kuach'i ko xanre kjuachajngire. 'Ba rey xi tjin ngasun'ndio kitsa'enko kjuachajngi. 'Ba jo kji'i ngasun'ndio xuta xi bateñaya 'ba batseya kuanyina ngat'are nkjin tsajmi xi tsatse nga tsangisjaintsjai xi sits-jare yojore."

<sup>4</sup> 'Ba jaskan kjint'e \_ra kja'e jnda xi jendibani ngank'aa. 'Bi kitsu: "T'etukajiu naxinandabiu jun xi xutanq, tuxi bi skajinñu jere 'ba bi kuitjaxtiu kjuana'en xi sakure. <sup>5</sup> Ngat'a je tifechu jere 'nda ngank'aa, 'ba tjin kakun=re Na'enchana je xi inyatsa'en.

<sup>6</sup> 'Nde 'batsa'en tingojoni\_ru jo kitsiko xuta xi kja'ere. Ka'nda jó ndiya tingojon\_ru xi kitsa'en. Tinyajiu chutsinre mé= xi k'ui, jó ndiya ngisa 'ñu kjan ngisa nga ko mare xi kitsjare xuta xi kja'ere. <sup>7</sup> Jotsa'en 'ñu nk'a ts'axje yojore 'ba nda tsik'ejña nga tsangisjaintsjai xi sitsjare yojore, 'ba nde tsa'en 'ñu ta'e\_ru kjuanima ko kjuaba nganda'e. Ngat'a tsikja'etsjen nga 'bi tsu: An=ñä jngu reina 'ba tejñasaqñ yaxile nga tebatexumaq. Bi chjun k'an kuáqñ. Bi s'ëna kjuaba. <sup>8</sup> Kui= kjua nga jngu ka'a fani kjua'ene yejeni kjuana'en xi sikja'are kjuanima: kjuabeya, kjuaba 'ba ko kjindia. 'Ba ko

ndi'i kuitini, ngat'a tjinre kjua'ñu Na'enchana xi titsa'enre kjua."

<sup>9</sup> 'Ba rey xi tjin ngasun'ndio xi kitsa'enko kjuachajngi chjunbiu, xi tsangisjaintsjaiko xi sit-sjare yojore, kui xi ski'nda 'ba kuabare nga skue ni'ndi xi ti'betju ña tití. <sup>10</sup> 'Ba kjin kuinya, ngat'a sakjunre kjuana'en xi tifa'axtiu chjunbiu, 'ba kuetsu: "¡Nimaxuni, nimaxuni naxinanda je, naxinanda xi Babilonia 'mi xi tjinre kjua'ñu! Ngat'a ngutjun fani kjiña'anre kjua."

<sup>11</sup> 'Ba xuta xi tjin ngasun'ndio xi bateñaya 'ba batseya 'ba nde ski'nda 'ba kuabare ngat'are kui, ngat'a nde tsajainni xi kuatse ch'a xi kjua'eko. <sup>12</sup> Kui= xi ja'eko nga yateña oro, plata, nkjin kuya ndiojo xi tsjakun, nkjin kuya najñu xi chji, najñu xi kuán kun ko xi ini, nkjin kuya ya xi nda jen, nkjin kuya tsajmi xi kis'endakoni nindare tjiuniña, ya xi 'ñu chji, bronce, kicha, ndiojo, <sup>13</sup> canela, tjiuxin xi nda jen, tjingusja, nanda xi nda jen, chojo xi nda jen, binu, aseti, harina, trigo, tjiundija, chutsanga, chakabayu, carreta xi kjefe chakabayu, 'ba ka'nda chu'nda xi sateña.

<sup>14</sup> 'Ba nchja xi bateñaya 'ba batseya 'bi kuetsure naxinando: "¡Nde tsajainniri tsajmi xi tsjakun xi 'ñu kuamejénri! ¡Je= kjinichajakjin tsajmiri xi tsjakun ko kjuanyinari! ¡Niñajan nde sakuniri!"

<sup>15</sup> 'Ba kjin kuinya nchja xi bateñaya 'ba batseya, xi kuanyina ngat'are naxinando, ngat'a sakjunre kjuana'en xi tifa'axtiu naxinando. Ski'nda 'ba siba <sup>16</sup> nga 'bi kuetsu: "¡Nimaxuni, nimaxuni naxinanda jio! Xi yaja najñu chji xi kuán kji'i ko xi ini kji'i, xi yajunre oro ko nkjin kuya ndiojo xi tsjakun. <sup>17</sup> Ngu ngutjun fani je yeje kjuanyina jebiu."

'Ba kjin tsikinya ngatsi'i nchja xi batexuma ngaya barku, ngatsi'i xi 'betsumajin ndachikun, ngatsi'i xi tsa'exako barku, ko ngatsi'i xi jenre ton nga tsa'exa ngaya barku. <sup>18</sup> 'Ba nga tsabe ni'ndi xi ti'betju ña titi naxinando, 'ñu kinchja nga 'bi kitsu: “¿Ñá=re naxinanda xi 'ba kji'i joni naxinanda jio?” <sup>19</sup> 'Ba 'etsojo'a chojo nindaku, kiski'nda, 'ba kitsiba nga 'bi kitsu: “¡Nimaxuni, nimaxuni naxinanda jio! 'Ñu= tsatse tsajmi xi chji, 'ba kuanyina ngatsi'i xi tjinre barku ngajin ndachikun. Tunga ngutjun fani kjinikjekjua ngayéje.”

<sup>20</sup> Titsja\_ru yojonu jun xi tetsubo ngank'aa, jun xi xuta tsjere Na'enchana kuon, nchja chinga apóstol 'ba ko jun xi profeta kuon ngat'are mé=xi tjemata'en naxinando. Ngat'a Na'enchana je=kitsa'enre kjua naxinando ngat'are xi kitsikonu.

<sup>21</sup> 'Ba jaskan jngu ankje xi 'ñu tjinre kjua'ñu kiskjenitjen jngu ndiojo xi 'ñu tse 'ba kiskanikja'ajin ndachikun nga 'bi kitsu: “'Bi=tsa'en 'ñu xanikja'ari ngi'ndio naxinanda je xi Babilonia 'miri, 'ba tu'yá nde skueniri. <sup>22</sup> Bi nde kjuinu'yanire ngaya ndiya teri nga kjuane najni arpa, flauta ko tjio. Bi nde s'eni kio nchja xi mare ninda nkjin kuya tsajmi. Bi nde kjuinu'yanire nga s'iu trigo ngayeje. <sup>23</sup> Niñajan nde sitsejenni ndi'ire lámpara ngaya ndiya teri 'ba bi nde kjuinu'yanire s'ire kjuabixan, ngat'a xutari xi yateñaya 'ba tsatseya kuán xi nda 'yare jo kji'i ngasun'ndio, 'ba ngayéje naxinanda xi tjin ngasun'ndio kich'onacha=re ngat'are kjuacha xi ñe'en.”

<sup>24</sup> Ngu kui naxinandabiу ya'anijin jinre nchja

chinga profeta, xuta tsjere Na'enchana ko ngatsi'i xi kjinikjesun ngasun'ndio.

## 19

<sup>1</sup> Nga je kuán kibiu, kjint'e\_ra xi 'batsa'en kjinu'yare joni jndare 'ñu nkjin xuta xi 'ñu kinchja ngank'aa nga 'bi kitsu: “¡Ngatjanichjire Na'enchana! Kui= xi tsik'angina 'ba xi tu kui tajngu tse'e yeje kjuaje ko kjua'ñu. <sup>2</sup> Ngat'a kixi=tsa'en kjua nga ko fani kjuakixi, 'ba kitsa'enre kjua chjun masen xi nda 'yare, xi kitsijndi xuta xi tse'e ngasun'ndio ko kjuachajngire. 'Ba Na'enchana je= kitsingojore jinre xutare.”

<sup>3</sup> 'Ba nde 'ba= kitsu ngani: “¡Ngatjanichjire Na'enchana! Ni'ndi xi ti'betukajin naxinando, kuijinntsjai ka'nda ngantsjai nixtjin.”

<sup>4</sup> 'Ba jaskan kitsikindi yojore 'nda t'anangiu nchja chinga xi kañujun ko nga ñujun xi tjindukun nga kitsichjire Na'enchana xi tijñasun yaxile ña tibatexuma. 'Ba 'bi kitsu: “¡'Ba ngatjama! ¡Ngatjanichjire Na'enchana!”

<sup>5</sup> 'Ba kjinu'yare jngu jnda xi jendibani ña sejña yaxilio xi 'bi kitsu: “Tichji\_ru Na'enchana ngatsi'u xi ña'axat'a\_ru kui 'ba 'yakun, ninga xi n̄im̄a 'ba ninga xi tjinre kjua'ñu.”

### *S'ire kjuabixanre Ki'ndi borrego*

<sup>6</sup> 'Ba jaskan kjint'e ngañaa xi 'batsa'en kjinu'yare joni jndare 'ñu nkjin xuta. Kjinu'yare jotsa'en fane ña ntjai nanda 'ba joni nga 'ñu fane cho'on. Xi kitsu: “¡Ngatjanichjire Na'enchana! Ngat'a je tibatexuma Na'enchana, Na'en xi tjin yejere kjua'ñu xi tjin. <sup>7</sup> Sitsja\_ra yojona 'ba 'ñu

ngatjas'ena kjuatsja 'ba sikixiya nga kui tjinre kjuaje, ngat'a je ja'e chubare kjuabixanre Ki'ndi borrego, 'ba chjunre je tijñandare yojore. <sup>8</sup> Je kitsa'e'ndere nga kuaja najñu tiba xi chji, xi tsje, 'ba xi tiba'na, xi tsunire mé= xi kitsa'en xuta tsjere Na'enchana nga kixi fiko yojore."

<sup>9</sup> 'Ba ankje kitsuna: "Ti'indi kibi: jNdaxure xi kjinikjint'e s'ire kjuabixanre Ki'ndi borrego!" 'Ba nde kitsu ngisana: "Kui=bi xi en kjuakixire Na'enchana."

<sup>10</sup> 'Ba jaskan tsakasenkunch'int'a\_ra ankje nga sichji\_ra tsakaiñu, tunga 'bi kitsuna: "Bi 'ba ñe'en. An= xi 'ba nde tetsa'exang\_ra Na'enchana joni ji ko nts'é xi kixi 'bejñatjo en xi kitsuyakixi Jesús. Na'enchana xi tjinnere nga sichji\_ri."

Ngu en xi kitsuyakixi Jesús, enbi xi tsikinchjare nchja chinga profeta.

### *Xi tijñakjare chakabayu tibo*

<sup>11</sup> 'Ba jaskan tsa'biä nga kichjux'a ngank'aa. 'Ba kji'yare jngu chakabayu tiba. 'Ba xi tijñakjare, kui= xi Kixi 'ba Kjuakixi 'mi ngat'a kixi= tsa'en nga tsa'en kjua 'ba nga kjan. <sup>12</sup> 'Ba 'ba kun tuxkun joni ndi'i, 'ba nkjin corona tjisunre, 'ba tjit'are jngu ja'en xi tu kui tajngu be. <sup>13</sup> 'Ba yaja jngu najñu xi 'yajunre jin. 'Ba ja'enre, kui xi Enre Na'enchana. <sup>14</sup> 'Ba tjenngire chasoldadu xi tjin ngank'aa. Tjindukjare chakabayu tiba nga yaja najñu xi chji, xi tiba 'ba xi tsje.

<sup>15</sup> 'Ba nga'a ts'a ti'betjuni jngu kicha xi 'ñu yojozkun kji'i, tuxi sikja'ani kjuanima nangi xi tjin ngasun'ndio. 'Ba kuatexumakonire yaníse xi kicha kuandani. Sa'enre kjua joni xi basenne

uva nga tsits'iungi, 'ba sikasennere kjuasti jere Na'enchana xi tjin yejere kjua'ñu xi tjin. <sup>16</sup> Najñu nduju xi yaja ko ngasure kua'indut'a ja'enbi: "Reyre rey 'ba Naire nai."

<sup>17</sup> 'Ba tsa'biä jngu ankje xi sejñajin ndi'ire tsu'biu. Xi 'ñu kinchja nga 'bi kitsu ts'i'ire tjiunike xi inyatutjen ngank'aa: "Jabiu 'ba ngatamaku nga xino xichine xi 'ñu tse xi tsja Na'enchana. <sup>18</sup> Ndeninchjo yojore mik'en xi tse'e rey, xi tse'e ngakure chasoldadu, xi tse'e nchja xi 'ñu kakun, xi tse'e chakabayu ko xi 'bendukjare, ko xi tse'e ngatsi'i xuta, ninga xi ndai asa chu'nda xi tsindaa, 'ba ninga xi tjinre kjua'ñu asa xi nima."

<sup>19</sup> 'Ba jaskan tsa'biä tjiubabiu ko rey xi tjin jo kji'i ngasun'ndio nga tjenko chasoldadure. Xi kuañajan, tuxi skjankoni xi tijñakjare chakabayu ko chasoldadure. <sup>20</sup> 'Ba tjiubabiu kjinduba'ñu ñatjen ko profeta ndesu xija'ba je kitsa'en kjuakun ngixkun. Ngat'are kjuakunbiu tsak'onachakonire xuta xi kitsja'nde nga kis'et'are chubare tjiubabiu 'ba xi kitsichjire isenre. Ngu kichanikja'ajin tjikun tjiubabiu ko profeta ndesu ngajin nga'nde xi kitse ndi'i xi titíkonи asufre. <sup>21</sup> 'Ba ngatsi'i chasoldadure kjinikjesunkoni kicha xi ti'betjuni ts'a xi tijñakjare chakabayu. 'Ba ngatsi'i tjiunike kiskine yojore nchjabiu 'ba 'ñu kitsere.

## 20

### *Jngu mi nu*

<sup>1</sup> 'Ba jaskan tsa'biä jngu ankje xi jendibajenni ngank'aa xi ya'a llavere nga'nde ña 'ñu nanga tixa. 'Ba nde ngaya tsja kji'ya jngu na'ñu kicha

xi 'ñu je ngayeje. <sup>2</sup> 'Ba ankjebiu kitsuba 'ba 'eta'ñu tjiuye jio, kui= xi tjiuye chinga, chanayi ko Satanás, 'ba jngu mi nu kis'eta'ñu. <sup>3</sup> 'Ba kiskanikja'aya nga'nde ña 'ñu nanga tixa 'ba ko llavebiu 'echjakoni. 'Ba 'enere jngu sello xuntjare, tuxi bi nde k'onachanire nangi xi tjin ngasun'ndio 'nda nga kjua'a jngu mi nu. 'Ba nga je kjua'a jngu mi nu, tjinnere nga stjunda ngutjunchi.

<sup>4</sup> 'Ba jaskan tsa'bιa nkjin yaxile. 'Ba xi tjindusun yaxilio, kui xi kitsa'ere kjua'ñu nga sa'enre kjua xuta. 'Ba nde tsa'bιa isennixtjinre xuta xi kitisin ngat'a kitsikja'axtiuya en xi kitsuyakixi Jesús ko enre Na'enchana, xi bi kitsichjire tjiubabiu ninga isenre 'ba xi bi kitsja'nde nga kis'et'are chubare tjiubabiu stjen asa ntsja. Ja'aya nganire ngajinre mik'en 'ba ñatjen yataxumako Cristo jngu mi nu. <sup>5</sup> Tunga ngat'are mik'en xi yak'a, bi ja'ayare ngajinre mik'en 'nda nga je ja'a jngu mi nu. Xi kuatexumako Cristo, kui xi tjun ja'ayare. <sup>6</sup> jNdaxure xuta xi 'batsa'en k'uakot'are nga tjun kjua'ayare! Ngu xuta tsjere Na'enchana kuan 'ba kjuabeya xi majóni tsajainre kjua'ñu= tsa jó siko kui. Tusa na'mi kuan ngixkun Na'enchana 'ba ngixkun Cristo, 'ba jngu mi nu ñatjen kuatexumako.

### *Jótsa'en kitsichaja chanayiu*

<sup>7</sup> Nga je kjua'a jngu mi nu, kjuinuntjin chanayiu nga'nde ña kjiya'ñu. <sup>8</sup> 'Ba k'uetju nga k'onachare nangi xi tjindu nga ñujun ngatere ngasun'ndio. K'onachare nangi Gog ko nangi Magog 'ba k'ueku chasoldadure nga skjan xi 'batsa'en 'ñu nkjin

mani joni tsumi xi tjin ndai ndachikun xi bi ma s'exki.

<sup>9</sup> 'Ba tsik'etsumasun jokji'i nga teya ngasun'ndio 'ba 'echjanga'ya naxinanda xi Na'enchana tsimején ña tjindu xuta tsjere. Tunga ngank'aa jendibajenni ndi'i xi niki yakakjin chasoldadubiu. <sup>10</sup> 'Ba chanayi xi tsak'onachare nchjabiu, kichanikja'ajin nga'nde xi kitse ndi'i xi titikoni asufre, ña 'ba nde ja'ba je kichanikja'ajin tjiubabiu ko profeta ndesubiu. Kio kjua'a kjuanima nga nixtjin nga nistjen ka'nda ngantsjai nixtjin.

### *Jótsa'en kjiñ'a'anre kjua xi jesun*

<sup>11</sup> 'Ba tsa'biä jngu yaxile je xi tiba kji'i ko xi tijñasun. 'Ba ngixkun kui t'anangiu ko ngank'aa kitsichajakjin 'ba niñajan nde kji'yanire. <sup>12</sup> 'Ba tsa'biä xuta xi jesun, xi tjinre kjua'ñu ko xi njima, xi inya ngixkun yaxilio. 'Ba kichju'i nkjin xujun, 'ba nde kichju'i kja'e xujun xi tsu 'yá xi s'ere kjuabenichun xi bi fet'a. 'Ba kjiñ'a'anre kjua xi jesun jotsa'en kua'indut'a xujun xi tsu mé=xi kitsa'en. <sup>13</sup> 'Ba xuta xi jesunjin ndachikun 'etukajin 'ba kiji ngixkun xi tijñasun yaxilio nga kuanre kjua. 'Ba tsisetjen xi tjindunijin t'anangiu ko xi tjindu nga'ndere mik'en. 'Ba kjiñ'a'an tsi'ire kjua jo nga kitsa'en nga jngu jngu. <sup>14</sup> 'Ba jaskan kjuabeyo ko nga'ndere mik'en kichanikja'ajin nga'ndebiu xi kitse ndi'i xi titikoni asufre. Nga'ndebiu xi kitse ndi'i, kui= xi kjuabeya xi majóni. <sup>15</sup> 'Ba xi bi kua'indut'a ja'enre xujun xi tsu 'yá xi s'ere kjuabenichun xi bi fet'a, kui= xi 'ba nde kichanikja'ajin nga'ndebiu xi kitse ndi'i ngayeje.

# 21

## *Ngank'a xatse ko t'anangi xatse*

<sup>1</sup> 'Ba jaskan tsa'biä jngu ngank'a xatse ko jngu t'anangi xatse, ngat'a je kichajakjin ngank'a xi tjun ko t'anangi xi tjun. 'Ba bi nde kis'eni ndachikun. <sup>2</sup> 'Ba tsa'biä naxinanda tsjere Na'enchana, xi Jerusalén xatse, nga tjindibajenni ngank'aa. Xi kjinikasen ngat'are Na'enchana 'ba xi 'batsa'en kis'enda joni jngu chjun xi tibixan xi kjinikaja jngu xutji xi tsja=kji'i nga tikuyare xi xi'iun. <sup>3</sup> 'Ba kjint'e\_ra jngu jnda xi 'ñu kinchja, xi jendibani ña sejña yaxilio nga 'bi kitsu: "Na'enchana je tijña ngajinre xuta nganda'e. Kui k'uejñajinre xuta, 'ba xutabiu naxinandare kuan. Na'enchana suba k'uejñajinre 'ba kuan Na'enre. <sup>4</sup> Kui sixijun yeje ndaxkun, 'ba bi nde kueyani ninga bi nde sibani. Bi nde ski'ndani ninga bi nde kjua'ani kjuanima, ngat'a ngasun'nde xi tjun je bi nde tjinni."

<sup>5</sup> 'Ba xi tijñasun yaxilio 'bi kitsu: "An tetsixatse=ñä ngayéje xi tjin." 'Ba nde kitsu ngayeje: "Ti'indi kibi, ngat'a kjuakixi= enbi 'ba ma chun\_ra."

<sup>6</sup> 'Ba nde kitsu ngisana: "Je kuajngu. An=ñä xi alfa ko omega, xi titjun 'ba xi fet'ani. Xi xindare an sjakjuatjo\_ra nga'nde ña tju nanda xi tsjare kjuabenichun xuta. <sup>7</sup> Xi sa'en, kui xi sakure kjuandabiu. 'Ba an kúañ Na'enre 'ba kui kuan ki'ndinä. <sup>8</sup> Tunga kui xi tsakjun, xi bi makjainre, xi tsa'en kjuanayi, xi tsik'en xuta, xi tsa'en kjuacha-jngi, xi tsa'en kjuacha, xi bekun na'en xi ntsja xuta tsindani, ko ngatsi'i xi tsu en ndesu, kui xi 'ba

tjinni nga kjuunikja'a kjuanima nga xanikja'ajin nga'nde xi kitse ndi'i xi ko asufre titíkoni. Kui xi kjuabeya xi majóni."

### *Jerusalén xatse*

<sup>9</sup> 'Ba kitsitiñat'ana jngu ankje xi s'ejñajinre ankje xi yatu, ankje xi ya'a jngu nisu xi yatu tsakaiñu xi inya kjuana'en xi yatu xi fet'ani. 'Ba kitsuna: "Jabi. Kuakura chjun xi kuixan xi kuan chjunre Ki'ndi borrego." <sup>10</sup> 'Ba meni ja'e ngajinna Isennixtjintsjere Na'enchana 'ba ankje kikona jngu nindu je xi 'ñu nk'a. 'Ba kio yakuna naxinanda tsjere Na'enchana, xi naxinanda Jerusalén, nga tjindibajenni ngank'aa. Xi kjinikasen ngat'are Na'enchana. <sup>11</sup> 'Ba ndi'ire kjuajere Na'enchana titsika'na naxinando joni ndiojo xi tsja kji'i xi 'ñu chji. Jo=ni ndiojo xi jaspe 'mi, xi 'na 'ba matsejenya joni chutsin. <sup>12</sup> 'Ba naxinando tjinch'andaire jngu xjo je 'ba nk'akoni, xi tejó mani xuntjare. 'Ba nga jngu jngu xuntjo jngu ankje inyaxtiu. 'Ba xuntjabiu kua'indut'a ja'enre ntjere Israel xi tejó ka'a mani. <sup>13</sup> 'Ba ján mani xuntja xi tixa ña tjenni ngituts'ian 'ba ján ña ntjai tsu'biu 'ba ján ngate skjun 'ba ján ngakixi. <sup>14</sup> 'Ba tejó mani tut's'in xjore naxinando. Nga jngu jngu kua'indut'a ja'enre apóstore Ki'ndi borrego.

<sup>15</sup> 'Ba ankje xi tifakona ya'a jngu ya chüba xi oro ni tuxi k'uechubakoni naxinando, xuntjare ko xjore. <sup>16</sup> 'Ba naxinando ngusun= tsa'en teya. Nga nduju 'ba nga teya tu jngu= chuba. 'Ba ankje 'echubakoni yachubare naxinando, 'ba jó mi ko jó sientu kilómetro tjinre. Nga nduju 'ba nga teya 'ba nga nk'a tu jngu chuba. <sup>17</sup> 'Ba jaskan 'echüba xjo

xi tjinch'andaire ngayeje. 'Ba yachute ko tgio'on metro tjinre. Chubaq xi tsichjen xuta, ndekui xi kitsichjenni ankje.

<sup>18</sup> 'Ba xjo xi tjinch'andaire kuánni ndiojo xi tsjakun xi jaspe 'mi, 'ba naxinando kuandakoni suba oro xi 'na 'ba matsejenya joni chutsin. <sup>19</sup> 'Ba tut's'in xjore naxinando yajunre ngayéje kuya ndiojo xi tsja kun xi chji. Xi titjun, jaspe. Xi majóni, zafiro. Xi majánni, ágata. Xi mañujunni, esmeralda. <sup>20</sup> Xi ma'ónni, ónice. Xi majonni, cornalina. Xi mayatuni, crisólito. Xi majinni, berilo. Xi mañajanni, topacio. Xi mateni, crisoprasa. Xi matejnguni, jacinto. 'Ba xi matejóni, amatista. <sup>21</sup> 'Ba xuntja xi tejó, kui xi tejó ndiojo xi tsakjun xi perla 'mi. Nga jngu jngu xuntjo tu jngu perla kuandakoni. 'Ba ndiya te xi ngisa bitjajmeya, kui xi kuánkoni suba oro xi 'na 'ba matsejenya joni chutsin.

<sup>22</sup> 'Ba njnguú ningu tsa'biä ngajinre naxinando. Ngat'a ningure naxinando, kui xi Ki'ndi borrego ko Na'enchana, Na'en xi tjin yeje kjua'ñu xi tjin. <sup>23</sup> 'Ba naxinando bi machjenre nga tsu'biu asa na'enso sitsejenre, ngat'a ndi'ire kjuajere Na'enchana tsitsejenre, 'ba Ki'ndi borrego kui xi ndi'ire naxinando.

<sup>24</sup> 'Ba ngatsi'i xuta xi tjin ngasun'ndio k'uetsumajin ndi'i xi ndibani naxinando, 'ba kio kjua'eko kjuanyinare rey xi tjin ngasun'ndio.

<sup>25</sup> Bi s'echja xuntjare naxinando nga nixtjin 'ba bi kuajñu kio. <sup>26</sup> 'Ba ngatsi'i xuta xi tjin ngasun'ndio kio kjua'eko kjuanyinare ko tsajmire xi tsjakun.

<sup>27</sup> Nimé xi jndi tjin ngixkun Na'enchana kuan kjua'as'en kio, ninga xuta xi tsa'en kjuanayi, ninga xi tsu en ndesu. Tu kui sani kjua'as'en kio

xi kua'indut'a ja'enre xujunre Ki'ndi borrego ña tsu 'yá xi s'ere kjuabenichun xi bi fet'a.

## 22

<sup>1</sup> 'Ba jaskan ankje yakunā jngu ndaje xi tjinre nanda xi tsjare kjuabenichun xuta. Xi 'na 'ba matsejenya joni chutsin. 'Ba kio ti'betjuni ña sejña yaxile ña tibatexuma Na'enchana ko Ki'ndi borrego. <sup>2</sup> 'Ba ngamasenre ndiya tere naxinando xi ngisa bitajmeya 'ba nga jngu jngu ngatere ndajio inya yatuntje xi tsjare kjuabenichun xuta. Xi bajare tejó ka'a tu nga jngu nu. Jngu jngu ndiya bajare tu xki sa. 'Ba xkare yabiu nichjen= tuxi sindani ngatsi'i xuta xi tjin ngasun'ndio. <sup>3</sup> Tume nde s'eni xi ch'o kik'inre ngat'are Na'enchana. 'Ba ngajinre naxinando sasen yaxile ña batexuma Na'enchana ko Ki'ndi borrego, 'ba xuta xi tse'e sichjire. <sup>4</sup> 'Ba skuekjin fa nkjain 'ba stjen kua'indut'a ja'enre. <sup>5</sup> 'Ba kio bi nde s'eni nistjen 'ba bi nde kuanachjennire ndi'i lámpara ninga ndi'ire tsu'biu, ngat'a Na'enchana sitsejenre xuta xi kio k'uendu. 'Ba xutabiu kuatexuma ka'nda ngantsjai nixtjin.

### *Nixtjin nga kjua'e Jesucristo*

<sup>6</sup> 'Ba jaskan ankje kitsunā: "Kui enbi xi kjuakixi 'ba ma chun\_ra. Na'enchana, Na'en xi tsikinchja nchja chinga profeta, kui xi je kitsikasen ankjere, tuxi kuakutsejennire xutare mé= xi tjinnere kuan xati."

<sup>7</sup> "Chutsijon. ¡Je mején kjua'aq! ¡Ndaxure xi kixi 'bejñatjo en xi kua'indut'a xujunbi, xi titsuyatitjun xi tjinnere kuan!"

<sup>8</sup> An, Juan, kjint'e=ñ<sub>a</sub> 'ba tsa'be=ñ<sub>a</sub> kibi. 'Ba jaskan nga je kjint'i<sub>a</sub> 'ba tsa'b<sub>a</sub>, tsakasenkunch'int'a\_r<sub>a</sub> ankje xi yakuna<sub>a</sub> kibiu nga sichji\_r<sub>a</sub> tsakaiñu. <sup>9</sup> Tunga 'bi kitsuna<sub>a</sub>: "Bi 'ba ñe'en. An= xi 'ba nde tetsa'exang\_r<sub>a</sub> Na'enchana joni ji ko nts'ē xi profeta 'ba joni ngatsi'i xi kixi 'bejñatjo en xi kua'indut'a xujunbi. Na'enchana xi tjinnere nga sichji\_ri." <sup>10</sup> 'Ba nde kitsuna<sub>a</sub>: "Bi 'bejña'mai en xi kua'indut'a xujunbi, xi titsuyatitjun mé= xi tjinnere k<sub>a</sub>ñan, ngat'a je tifechu tiña nixtjin nga k'uetjesun kibiu. <sup>11</sup> Xi ch'okun, janda ngatatsa'en xi jndi tjin. Xi nda, janda ngatatsa'en xi nda tjin. 'Ba xi tsje, ngisa ngatjamatsje ngisa."

<sup>12</sup> "Chutsijon, je kjuixati<sub>a</sub>. 'Ba kjua'eko=ñ<sub>a</sub> chji xi sja\_r<sub>a</sub> nga jngu jngu xuta jo nga kitsa'en. <sup>13</sup> An=ñ<sub>a</sub> xi alfa ko omega, xi titjun 'ba xi jaskanni, xi tut'sin 'ba xi fet'an."

<sup>14</sup> ¡Ndaxure xuta xi tibane najñure, tuxi kua'e'ndenire nga kjua'as'en xuntjare naxinando 'ba skine ture ya xi tsjare kjuabenichun xuta! <sup>15</sup> Tunga ngandetsian xinyandu xuta ch'okun, xi tsa'en kjuacha, xi tsa'en kjuachajngi, xi tsik'en xuta, xi bekun na'en xi ntsja xuta kuandani, ko ngatsi'i xi matsjare tsu en ndesu nga nchja.

<sup>16</sup> "An, Jesús, je kitsikasi<sub>a</sub>ñ ankjena<sub>a</sub>, tuxi kuet-suyakixinire kibi xuta xi makjainre ngat'an<sub>a</sub>. An=ñ<sub>a</sub> ntjere David, nts'en xi ndibanire jamare kui, 'ba an= ñ<sub>a</sub> niñu xi ngisa 'ñu tsitsejen nga je tjis'e isen."

<sup>17</sup> "¡Jabi!", titsu Isennixtjintsjere Na'enchana ko chjunre Ki'ndi borrego. 'Ba xi tibasen ñojon

ngatatsu: “¡Jabi!” 'Ba xi xindare ngatjendiba, 'ba tu'yañu xi mejénre ngat'ikjuatjo nanda xi tsjare kjuabenichun xuta.

*En xi fet'ani xujunbi*

<sup>18</sup> An xinyakixi titjun\_ra ngatsi'i xuta xi in-yabasen ñojonre en xi kua'indut'a xujunbi, xi titsuya mé= xi tjinnere kuan: Tu'yañu xi k'uesunre en xi kua'indut'a nga'e, Na'enchana k'uesunre kjuana'en xi kjinukjua ngat'are xujunbi. <sup>19</sup> 'Ba tu'yañu xi skja'axinre en xi kua'indut'a xujunbi, xi titsuya mé= xi tjinnere kuan, Na'enchana skja'axinre tu xi kua'ere tsakaiñu, xi bajare yatun-tje xi tsjare kjuabenichun xuta. 'Ba Na'enchana skja'axinre nga'nde xi kua'ere tsakaiñu ngajin naxinanda tsjere xi kjinukjua ngat'are xujunbi.

<sup>20</sup> Xi titsuyakixi kibi, kui= xi titsu: “Jun, je kju'exatia.”

¡'Ba ngatjama! ¡Jabi, Na'en Jesús!

<sup>21</sup> Ngatjas'enu ngatsi'u kjuandare Na'enna Jesucristo. 'Ba ngatjama.

## **El Nuevo Testamento Mazateco de Ayautla New Testament in the Ayautla Mazateco language of Mexico**

copyright © 2009 Wycliffe Bible Translators, Inc.

Language: Mazateco, Ayautla

Translation by: Wycliffe Bible Translators, Inc.

Mazateco, Ayautla [vmy], Mexico

### **Copyright Information**

©La Liga Bíblica, A.C., 2009

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Mazateco, Ayautla

### **©Wycliffe Bible Translators, Inc., 2009**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
776ced1d-6ea7-59c3-8389-b2a94420d3be